

جريدة عدله

نومرو ۱۱۸

۱۳ ذی الحجه ۱۳۲۲ ۲۰ تشرين اول ۱۳۲۰

دوبئی سنه

بازار ایرتی

قائمیه

نوبهات عدله

سیواس ولایتی استیناف محکمه سی جزا دائره سی رئیس سعید زین الدین اقدینک وقت وزمانیه محل
مأموریتته عزیمت ایتامسنه مبنی عزلیله مذکور ریاسته حلب ولایتی استیناف محکمه سی مدعی عمومیه
حسن فهمی وحلب ولایتی استیناف محکمه سی مدعی عمومیلکنه بغداد ولایتی استیناف محکمه سی مدعی
عمومیه فوآد وبغداد ولایتی استیناف محکمه سی مدعی عمومیلکنه بغداد ولایتی مرکز بدایت محکمه سی
حقوق دائره سی رئیس عثمان رمزی وبغداد ولایتی مرکز بدایت محکمه سی حقوق دائره سی ریاسته
بغداد ولایتی مرکز بدایت محکمه سی جزا دائره سی رئیس رفعت وبغداد ولایتی مرکز بدایت محکمه سی
جزا دائره سی ریاسته بصره ولایتی استیناف محکمه سی مدعی عمومیلکندن آچقده قالان نوری ومعموره العزیز
ولایتی استیناف محکمه سی ریاسته ارضروم ولایتی استیناف محکمه سی رئیس شوکت وارضروم ولایتی استیناف
محکمه سی ریاسته بتلیس ولایتی استیناف محکمه سی رئیس عطا وبتلیس ولایتی استیناف محکمه سی ریاسته
معموره العزیز استیناف محکمه سی رئیس صبری وحلب ولایتی عدلیه مفتشلکنه اطنه ولایتی عدلیه مفتشی
اسحق توفیق وسوریه ولایتی عدلیه مفتشلکنه بیروت ولایتی مرکز قضاسی صلح حاکمی ادیب وبتلیس
ولایتی عدلیه مفتشلکنه ارضروم ولایتی مرکز قضاسی صلح حاکمی ذکریا وارضروم ولایتی مرکز قضاسی
صلح حاکملکنه سیملی بدایت محکمه سی حاکمی علی رضا و بیروت ولایتی مرکز قضاسی صلح
حاکملکنه سوریه ولایتی مرکز بدایت محکمه سی جزا دائره سی رئیس رشاد وسوریه ولایتی مرکز

بدایت محکمه‌سی جزا دائره‌سی ریاسته خداوندکار ولایتی مرکز بدایت محکمه‌سی مدعی عمومی‌سی رفعت و خداوندکار ولایتی مرکز بدایت محکمه‌سی مدعی عمومی‌کنه سیواس مبعوث سابق و یوزغاد سنجاغی بدایت محکمه‌سی مدعی عمومی معاون اسبقی حافظه مصطفی رضا افندیلر نقل و تعیین اولمش و معموره العزیز ولایتی استیناف محکمه‌سی مدعی عمومی علی خاکی افندی ایله بتلیس ولایتی استیناف محکمه‌سی مدعی عمومی عارف و دیاربکر ولایتی مرکز بدایت محکمه‌سی مدعی عمومی برهان الدین افندی ایله معموره العزیز ولایتی مرکز بدایت محکمه‌سی مدعی عمومی اشرف افندیلرک بجایشلری اجرا قلمشدر .

بو اراده سینه‌نك اجراسنه عدلیه ناظری مأموردرد . ۱۳ ذی القعدة ۱۲۳۲ ، ۲۱ ایلول ۱۳۳۰

محمد رشاد

صدراعظم
محمد سعید

عدلیه ناظری
ابراهیم

* *

در معادت بدایت محکمه‌سی مستطق اعضاسندن نظیف و بك اوغلی بدایت محکمه‌سی مستطق اعضاسندن و هبی بکرك بجایش مأموریتلری اجرا قلمشدر .

بو اراده سینه‌نك اجراسنه عدلیه ناظری مأموردرد .

۱۷ ذی القعدة ۳۳۲ ، ۲۵ ایلول ۱۳۳۰

محمد رشاد

صدراعظم
محمد سعید

عدلیه ناظری
ابراهیم

* *

سیواس ولایتی استیناف محکمه‌سی اعضاسندن زهدی افندیك وقوع وفاته مبنی یرینه حافق قضای بدایت محکمه‌سی رئیس حسین عونى و مذکور استیناف محکمه‌سی اعضا ملازملردن تمل افندیك مدت مأذونه‌سی تجاوز ایتدیره‌رك محل مأموریتته عزیمت ایتامسندن طولای مستغنی عدلیه یرینه ییلدیز ایلی قضای بدایت محکمه‌سی مدعی عمومی احمد شعبان افندیلر نقل و تعیین اولمشدر .

بو اراده سینه‌نك اجراسنه عدلیه ناظری مأموردرد .

۱۷ ذی القعدة ۱۳۳۲ ، ۲۵ ایلول ۱۳۳۰

محمد رشاد

صدراعظم
محمد سعید

عدلیه ناظری
ابراهیم

* *

در معادت بدایت محکمه‌سی مستطق اعضاسندن نظیف و بك اوغلی بدایت محکمه‌سی مستطق اعضاسندن و هبی بکرك بجایش مأموریتلری اجرا قلمشدر .

۳۵

حوران سنجاغی بدایت محکمه‌سی اعضالغنه غزه قضای بدایت محکمه‌سی مدعی عمومی توفیق و نابلس سنجاغی بدایت محکمه‌سی اعضای سابقه‌سندن شکری قره و یلدیز ایلی قضای بدایت محکمه‌سی مدعی عمومی‌کنه قونیه مکتب حقوقدن اعلی درجه مأذون احمد نافذ و بیروت ولایتی مرکز بدایت محکمه‌سی اعضا ملازمی داود افندیك وقوع استعفا مبنی یرینه بنی صعب قضای بدایت محکمه‌سی مستطق رشدی و بغداد ولایتی مرکز بدایت محکمه‌سی سرمستطق‌کنه محکمه مذکوره ایکنجی مستطق جمیل و نجف اشرف قضای بدایت محکمه‌سی مستطق‌کنه بصره ولایتی مرکز بدایت محکمه‌سی مستطق عارف و مصطفی پاشا قضای بدایت محکمه‌سی مستطق‌کنه ترغویشته بدایت محکمه‌سی مستطق سابق حسن فهمی افندیلر تعیین اولمشدر .

بو اراده سینه‌نك اجراسنه عدلیه ناظری مأموردرد .

۲۴ ذی القعدة ۳۳۲ ، ۱ تشرین اول ۱۳۳۰

محمد رشاد

صدراعظم
محمد سعید

عدلیه ناظری
ابراهیم

* *

سوریه ولایتی استیناف محکمه‌سی اعضالغنه اطنه ولایتی ملنی تجارت محکمه‌سی ریاستندن آچقده‌قالان کر قور و لازقیه سنجاغی بدایت محکمه‌سی جزا دائره‌سی ریاسته حاسنجاغی بدایت محکمه‌سی جزا دائره‌سی رئیس خیری و حاسنجاغی بدایت محکمه‌سی جزا دائره‌سی ریاسته عکا سنجاغی بدایت محکمه‌سی جزا دائره‌سی رئیس رفعت و عکا سنجاغی بدایت محکمه‌سی جزا دائره‌سی ریاسته کرک سنجاغی بدایت محکمه‌سی رئیس حسن رضا و کرک سنجاغی بدایت محکمه‌سی ریاسته لازقیه سنجاغی بدایت محکمه‌سی جزا دائره‌سی رئیس عبدالغنی بوران و حافق قضای بدایت محکمه‌سی ریاسته ویزه قضای بدایت محکمه‌سی حاکم معاونلکندن مستغنی خلیل و موصل ولایتی مرکز بدایت محکمه‌سی اعضاسندن سیمون خنچریان افندیك قاعدی اجرا قلمسینه مبنی یرینه اطنه ولایتی مرکز بدایت محکمه‌سی اعضای سابقه‌سندن آرشاق و سینوب سنجاغی بدایت محکمه‌سی اعضالغنه اسباب صحیه مبنی تحویلی ایجاب ایدن زعفرانبولی قضای بدایت محکمه‌سی مدعی عمومی عبدالجلیل فائق و زعفرانبولی قضای بدایت محکمه‌سی مدعی عمومی‌کنه تحویل استدعاسنده بولنان نامروان قضای بدایت محکمه‌سی مدعی عمومی احمد جلال و مصطفی پاشا قضای بدایت محکمه‌سی حاکم معاونلکندن سیروز بدایت محکمه‌سی اعضای سابقه‌سندن قهرمان عون الله و چورلی قضای بدایت محکمه‌سی حاکم معاونلکندن شیران قضای بدایت محکمه‌سی ریاستندن مستغنی احمد نسیب و زور سنجاغی بدایت محکمه‌سی اعضا ملازم یافه قضای لوا بدایت محکمه‌سی اعضا ملازم سابق عبدالغنی و باندیرمه قضای بدایت محکمه‌سی مستطق

احمد توفیق افندینک بلا مأذونیت موقع مأموریتندن انفکاک ایتسنه مبنی غزلیله یرینه دیاربکر ولایتی مرکز بدایت محکمه سی سر مستطقی سابق امین ونیکده سنجانگی بدایت محکمه سی مستطقی صدیق افندینک وقوع استعفا سنه مبنی یرینه تحویل طلبنده بولنان چورلی قضاسی بدایت محکمه سی مستطقی فخری وچورلی قضاسی بدایت محکمه سی مستطقی کنه در سعادت مکتب حقوقدن علی الاعلی درجه ده مأذون علی توفیق و اوف قضاسی بدایت محکمه سی مستطقی کنه مکتب مذکور اعلی درجه مأذونلرندن سلیمان خلوصی افندیلر نقل و تعیین اولنش و تحویل مأموریتی ایجاب ایدن مرسین سنجانگی بدایت محکمه سی مدعی عمومیه سی جمیل افندی ایله اورفه سنجانگی بدایت محکمه سی مدعی عمومیه سی عبدالمجید وکنار قضاسی بدایت محکمه سی مستطقی محمد امین افندی ایله تحویل اقتضا ایدن مذکور مرسین سنجانگی بدایت محکمه سی مستطقی مصطفی و تحویل لری لازم کلن آیدین سنجانگی بدایت محکمه سی اعضا ملازمی سلیمان افندی ایله مرسین سنجانگی بدایت محکمه سی اعضا ملازمی ثروت افندیلرک بجایشلری اجرا قلمشدر .
بو اراده سنیه نک اجراسنه عدلیه ناظری مأموردر .

۲۷ ذی القعدة ۱۳۳۲ ، ۴ تشرین اول ۱۳۳۰

محمد رشاد

صدر اعظم
محمد سعید

عدلیه ناظری
ابراهیم

سیواس ولایتی استیناف محکمه سی جزا دائره سی رئیس حسن فهمی افندینک بیان معذرتله محل مأموریتنه عزیمت ایتماسنه مبنی بالعزل مذکور ریاسته در سعادت و بلاد ثلثه صلح حاکملرندن نجاتی و حلب ولایتی مرکز سنجانگی صلح حاکمکنه عینتاب قضاسی صلح حاکمی یونس و بتلیس ولایتی استیناف محکمه سی اعضاسندن عثمان وهبی افندینک تقاعدینی استدعا ایتسنه بناء یرینه تحویل ایجاب ایدن ملاطیه سنجانگی بدایت محکمه سی مدعی عمومیه سی عمر الیاس واینوز قضاسی بدایت محکمه سی حاکمکنه دیمتوقه قضاسی بدایت محکمه سی حاکم معاونی سلیمان افندیلر نقل و تعیین اولنشلردر .
بو اراده سنیه نک اجراسنه عدلیه ناظری مأموردر .

۲۸ ذی القعدة ۱۳۳۲ ، ۵ تشرین اول ۱۳۳۰

محمد رشاد

صدر اعظم
محمد سعید

عدلیه ناظری
ابراهیم

قوانین و نظامات

محاکم شرعیه ونظامیه نک تفریق وظائفی حقنده نظامنامه

ماده : ۱ تجارت وجزا و اموال غیر منقوله نک تصرف وانتقال وتقسیمه واقراض واستقراضه و گذشته و ضرر و زیان والتزامات وامتیازات ومقاولاته و کتاب هجردن ماعدا کیفیت حلی مجله احکام عدلیه ویدیکر قوانین ونظامات ایله معین مواد سائرمیه عائد بالمله دعاوی محاکم نظامیه ده وبونلرک خارجنده قالان رقبه وقفه و حجر وفک حجره و وصیته ونصب وعزل وصیه و اموال ایتام و اوقافک مداینتنه ومنقول وغیر منقول ترکاتک اصول فرائض وقوانین موضوعه دائره سنده تقسیمه متعلق اولان وموجب تحریر ترکات علیه اقامه اولنان دعاوی ایله سائر حقوق شرعیه دعوالری محاکم شرعیه ده رؤیت اولنور .
طرفینک محکمه شرعیه ده رؤیتنه بالرضا تحریراً موافقت ایده جکلری دعاوی دخی محاکم شرعیه ده رؤیت اولنوب بوندن طولای طرفیندن هیچ بری مؤخرأ محاکم نظامیه ده مراجعت ایده مز، ایدرسه دعواسی مسموع اولماز .

ماده : ۲ رؤیتی محکمه شرعیه ده عائد اولان دعاوی نک استماعندن حکام عدلیه ورؤیتی محاکم نظامیه ده عائد بولنان دعاوی نک استماعندن حکام شرع ممنوعدر .
ماده : ۳ اشبو نظامنامه تاریخ نشرندن معتبردر .
ماده : ۴ اشبو نظامنامه نک اجرای احکامی مقام مشیخت ایله عدلیه ناظرینه مفوضدر .
اشبو لایحه نظامیه نک موقع مرعیه وضعی ونظامات دولته علاوه سنی اراده ایلدم .
۲۳ ذی القعدة ۱۳۳۲ ، ۳۰ ایلول ۱۳۳۰

محمد رشاد

صدر اعظم وخارجیه ناظری
محمد سعید

شیخ الاسلام و اوقاف هایون ناظری
خیری

حریبه ناظری
انور

داخلیه ناظری
طلعت

عدلیه ناظری وشورای دولت
رئیس وکیل

بحریه ناظری
جمال پاشا*

مالیه ناظری
جاوید

نافعه ناظری
عمود

تجارت وزراعت ناظری
سلیمان البستانی

ابراهیم

معارف عمومیه ناظری

احمد شکری

اوسقان

قوانين موجوده عهود عتيقه به مستند احكامك لغوى حقننده قانون موقت

ماده : ١ ٢٦ اغستوس ١٣٣٠ تاريخي اراده سنيه احكامي موجبجه قاييتولاسيونلرك ملني اولديني ١٨ ايلول ١٣٣٠ تاريخندن اعتباراً بالعموم قوانين ونظامات دولت عليه ده عهود عتيقه به مستند اوله رق استثناء مندرج بولنان احكام مفسوخدر .

ماده : ٢ اشبو قانونك اجراي احكامنه هيئت وكلا مأموردر .

اشبو لايحه نك مجلس عمومينك كشدنده قانونيتي تكليف اولنق اوزره موقتاً موقع مرعيتيه وضعني وقوانين دولته علاوه سني اراده ايلدم .

٢٤ ذى القعدة ١٣٣٢ ٢ تشرين اول ١٣٣٠

محمد رشاد

داخليه ناظري طلعت	حربيه ناظري انور	شيخ الاسلام و اوقاف خيري	صدراعظم وخارجيه ناظري محمد سعيد
تجارت و زراعت ناظري سليمان البستاني	نافعه ناظري عمود	ماليه ناظري جاويد	بحريه ناظري احمد جمال
عدليه ناظري و شوراي دولت رئيسي و كيلي ابراهيم	پوسته و تلفراف و تلفون ناظري اوسقان	معارف ناظري احمد شكري	

تبعه عثمانيه ايله تبعه اجنييه آره سنده متكون اولوب ١٨ ايلول ١٣٣٠ تاريخنده در دست رؤيت اولان دعاوينك فصل وحسمنده تعقيب ايديله جك اصول محكمه يه دائر قانون موقت

ماده : ١ تبعه عثمانيه ايله تبعه اجنييه ببنده ١٨ ايلول ١٣٣٠ تاريخندن مقدم تحث ايدوب در دست رؤيت بولنان بيك غروشي متجاوز ومنقولاته دائر حقوق دعوالريه تجارت دعوالري شمدي به قدر مرعي اصول دائره سنده رؤيت و اكال ايديله جكدر . انحق اجانبه متدائر اولوب عهود عتيقه نك الغاسي سبيله مرتفع بولنان احوان استثنائيه نظر اعتباره النيه جقدر .

تاريخ مذكور دن اعتباراً كرك بدايه كرك استينافاً آلي آي مدته دعواسني تعقيب ايتيانلرك استدعالري ابطال اولنه جق وتجديد دعوي عر ضحالي دعوانك مقدار وماهيتيه نظراً عائد اولديني محكمه يه اطا اولنه جقدر .

ماده : ٢ اشبو قانون تاريخ نشردن اعتباراً مرعيدر .

ماده : ٣ اشبو قانونك اجراسنه عدليه ناظري مأموردر .

مجلس عمومينك انعقادنده قانونيتي تكليف اولنق اوزره اشبو لايحه قانونيه نك موقتاً موقع مرعيتيه وضعني وقوانين دولته علاوه سني اراده ايلدم .

٢٧ ذى القعدة ١٣٣٢ ٤ تشرين اول ١٣٣٠

محمد رشاد

عدليه ناظري
ابراهيم

صدراعظم
محمد سعيد

٢ رجب ١٢٩٦ تاريخي اصول محاكمات حقوقيه قانون موقتك

٨٠ و ٨١ نجبي ماده لريني معدل قانون موقت

ماده : ١ ٢ رجب ١٢٩٦ و ٩٠ حيران ١٢٩٥ تاريخي اصول محاكمه حقوقيه قانونك ٨٠ نجبي ماده سي بوجه آتي تعديل ايدلمشدر :

« سنداته ربطى عرف وعادت اولان هر درلو تعهدات ومقاولات ايله شركت والتزام واقراضه دائر اولوبده بيك غروشي متجاوز اولان ادعالر سندله اثبات اولنق لازمدر . خصوصات مذكوره يه دائر برسند قارشي درميان اولنان دعوي بيك غروشي تجاوز ايتديكي حالده بيله سند ويا مدعي عليهك اقرار ويا خود دفتريله اثبات اولنق لازمدر . »

ماده : ٢ قانون مذكورك ٨١ نجبي ماده سي بوجه آتي تعديل اولنمشدر :

« سكسانجى ماده ده بيان اولنان اصول وقاعده كذشته نك رأس الماله ضميله ويا خود اساساً ادعا اولنان بر قاچ قلم مبلغك برلشمسيه حاصل اولان مقدار بيك غروشي تجاوز ايتسه بيله جاري و مرعي اولور . »

ماده : ٣ اشبو قانونك اجراسنه عدليه ناظري مأموردر .

مجلس عمومينك اجتماعنده قانونيتي تكليف ايدلك اوزره اشبو لايحه قانونيه نك موقتاً موقع مرعيتيه وضعني وقوانين دولته علاوه سني اراده ايلدم .

٢٧ ذى القعدة ١٣٣٢ ٤ تشرين اول ١٣٣٠

محمد رشاد

عدليه ناظري
ابراهيم

صدر اعظم
محمد سعيد

صلح حاكمرينه متدائر ١٧ جمادى الاولى ١٣٣١ تاريخي قانون

موقتته مذييل ماده حقننده قانون موقت

ماده : ١ صلح حاكمرينه متدائر ١٧ جمادى الاولى ١٣٣١ تاريخي قانون موقتته ماده آتیه علاوه ايدلمشدر :

« اصول محاكمه حقوقيه قانون موقتك سكسان وسكسان برنجي ماده لريني معدل ٢٧ ذى القعدة ١٣٣٢ تاريخي قانون موقت حكمي صلح حاكمري حضورنده رؤيت اولنان دعاوي حقننده جاريدر . »

ماده : ٢ بوقانونك اجراسنه عدليه ناظري مأموردر .

مجلس عمومينك اجتماعنده قانونيتي تكليف ايدلك اوزره اشبو لايحه قانونيه نك موقتاً موقع مرعيتيه وضعني وقوانين دولته علاوه سني اراده ايدرم .

٤ ذى الحجه ١٣٣٢ ١١ تشرين اول ١٣٣٠

محمد رشاد

عدليه ناظري
ابراهيم

صدر اعظم
محمد سعيد

بلغارستان له منعقد ١٨ تموز ١٣٣٠ تاريخي تجارت و سير سفائن مقاوله نامه سنی مصدق قانون موقت
٣٧ تموز ١٩١٤

مقاوله نامه

(يكن نسخه دن مابعد و ختام)

اشبو موقت تجارت مقاوله نامه سنده دخی اعظمی مرعی اوله جبه اوله ١٣٣٢ سنده منعقد تجارت و كرك

اشبو موقت تجارت مقاوله نامه سنده ١٢ نومرولو ملفوفی :

نواحی متجاوره بیننده کی مناقلات و معاملات تجارتی به کوسریله جک مساعدات مخصوصه
متجاور قضا و « اوقولیا » لر بیننده کی معاملات و مناسباتی به تجارت یومیه نك ایجاب ایتدیردیکی تسهیلاتی
ارائه ایچون طرفین عاقدین زیرده محرر خصوصاتی قرارلشدیر مشلدر :
اولاً آتی الذکر موادك - تیمور یول واسطه سیله اجرا ایدیلن نقلیات مستثنا اوله رق - كرك اخراجده
و كرك ادخالنده و بر مملکتدن دیگر مملکتی امرانده هر کونه كرك رسمندن و لاعلی تعیین هر کونه ویرکو
و تکالیفدن متقابلاً معاف طوتیله جقلری مقرردر، شویله که :

(آ) هر دفعه سنده بش یوزغروش قیمته قدر هر نوع حبوبات و دققلر ؛
(ب) یولجیلر ایله قایقجیلرک ، آرابه جیلرک و عمله نك چاشیر ، البسه ، یول اشیایی ، آلات و ادوات مثللو کندی
استعمال ذاتیارینه مخصوص اشیایی ؛
(ث) حقیقه اشخاص و اشیا نقلنده قوللانیلان آرابه لر ، ال آرابه لری ، سپتر و سائر اجهزه مائله نقلیه ،
آرابه و یوک حیوانلری ؛

(د) احد طرفین اهالیسندن اولوب طرف دیگر اراضیسندن اقامتگاه اتخاذ ایدن اشخاص طرفندن ادخال ایدیلان
اثاث بیتیه ، مفروشات و ادوات مثللو اشیا (احد طرفین اهالیسندن اولوب دیگر طرف ممالکنده عقد ازدواج ایدن
نشانلیرک و یا یکی ازدواج ایتش کسانك جهازلری دخی عین معافیت رسومیه دن مستفید اوله جقدر) ؛

(هـ) نواحی متجاوره اهالیسنبه محصولات زراعیه لرینی و مثلاً حبوبات و سائر زراعت و جفت محصولاتی و کرچ
و مشروبات و مایعات سائرینی و حدود معاملات تجارتیه سنده عائد لاعلی تعیین سائر اشیایی جوار مملکتی نقلیه قوللانیلش
اولان و بوش اوله رق عین طریق ایله اعاده اولنان چوال و قابل ؛

(ف) موسم شتاده بر مملکتدن دیگر مملکتی قوری اوت ایله بسلنمک و یارعی ایتدیرمک اوزره سوئ ایدیلن
حیوانات ایله بوحیواناتك مواد مستحصه سی (مع هذا آتی ماه مدت انقضاسنده بونلرک مصارف تفتیشیه سی طلب اوله جقدر) .
ثانیاً كرك رسمیه تابع اوله رق ادخال ایدیلن متعنه مازالذکر معامله مساعدتکارانه دن مستفید
اوله بیلمسی ایچون مأمورین محلیه طرفندن اعطا قلنمش بر شهادتنامه ایله برابر ارسال ایدلملری و بوش شهادتنامه نك
مورد كركلری طرفندن تصدیق اولنمش اولسی و امتعه مذکوره نك حقیقه متجاور قضا و « اوقولیا » لردن
کلدیکنه دائر صراحتی محتوی بولنسی لازم کلیر .

اشبو شهادتنامه طرف دیگر اراضیسندن بر کونه تمغا رسمیه ویا لاعلی تعیین دیگر بر تکلیفه تابع
طوتیله میه جقدر .

ثالثاً متجاور قضا و « اوقولیا » لر اهالیسی ناحیه مأمورینی طرفندن ویرلمش و كرك مأمورین عائدیه سی
جانبندن ویزه ایدلمش یولنده و منتظم بر پساوانی حامل ایسه لر طرف دیگر اراضیسندن سربسته سیاحت
ایده بیله جکلردر . اشبو پساوانلر اون بش کون ایچون معمول و معتبر اوله جقدر .

اشبو موقت تجارت مقاوله نامه سنده دخی اعظمی مرعی اوله جبه اوله ١٣٣٢ سنده منعقد تجارت و كرك

اشبو موقت تجارت مقاوله نامه سنده ١٣ نومرولو ملفوفی :

خط امتیاز جوارنده کاش املاک مختلطه خقنده اتخاذ اوله جق اصول
خط امتیازك - سکنه سیله صاحب لرینی احد طرفین اراضیسندن و املاک ویا اراضی بی دیگر طرف الکاسنده
براقه جق صورتده - قطع ایتدیکی علی العموم املاک ایله اراضی « املاک متجاوره مختلطه » نامیه یاد اولنور .
بو املاک مختلطه نك ذرع ایدلمسی و ایشلدلمسی خصوصلرنجه ازاله محاذیر ایچون طرفین عاقدین خصوصات
آتی حقنده اتفاق حاصل ایتشدردر :

اولاً خط امتیاز جوارنده سساکن اولوب خط مذکورک اوتیه طرفنده املاک متصرف بولنان هر فرد
هرسنه كرك اداره عائدیه سنه ویرکونك تأدیه اولندیغی مین تحصیلدار طرفندن ویرلن مقبوض سندینی و بو
املاک کاش اولدینی قریه و یا ناحیه مأمورینی جانبندن اعطا اولنمش بر شهادتنامه بی ابرازده مجبوردر .

بو شهادتنامه تعریقات آتییه محتوی اولمق ایجاب ایدر :

(ا) بو املاک وجه تصرف ؛
(ب) املاک وسعت و بوعی ترلا ، چایر ، بطاقلق ، اورمان ، باراقه ، خانه ویا کلبه و سائر .
ثانیاً بوشهادتنامه كركده بر دفتر مخصوصه قید ایدیلوب علاقهدار اولان شخصه بر « یول تذکره سی »
ویریلور و بو تذکره شهادتنامه نك محتویاتی ذکر اولنور .

ناحیه متجاوره طرفندن ویرلمش شهادتنامه ایله یول تذکره سی آنجق برسنه مدته معتبردر . بونلر مجاناً اعطا
ایدیلر و هر کونه تکالیف و مصارفدن معافدرلر .

ملك صاحبی ویا چفتجی یول تذکره سی ضایع ایدلیکی حالده كرك طرفندن مجاناً بر نسخه ثانیه سی
اعطا اولنور .

ثالثاً املاک مختلطه صاحب لری ویا چفتجیلری یدلرنده یول تذکره لری بولندیغی حالده سربسته سی
ایتمک و آتی الذکر موادی هر کونه رسومدن معاف اوله رق ویا لاعلی تعیین بر کونه تکالیفه تابع بولنیه رق
ادخال ویا نقل ایتک صلاحیتدار اوله جقدردر . مواد مذکوره شونلدردر :

(ا) هر نوع آلات زراعیه ایله اراضیلرینی حراشته مخصوص ادوات و اجهزه ؛
(ب) حبوبات ، قوری اوت ، صان ، اودون ، سبزه و سائر کی محصولات ارضیه (بونلرک املاک متجاوره مختلطه دن
بشمش اولسی شرطدر و توتون مستثنادر) ؛
(ج) املاک مختلطه متجاوره متصرف ویا چفتجیلرینك ارزاق یومیه لرینه مقتضی مأکولات ؛

(d) املاك مختلطه به مخصوص كوبره و تخم ؛

(e) املاك مختلطه ده پايه جق مبانى به مخصوص مالزمه انشائيه ؛

(f) املاك مختلطه نك زرعه ده قوللانيلان حيوانات ايله نواحى اولتاقيرنه سوق اولتان ويا املاك مختلط دن برنده يتشديرلك اوزره كوندريلن حيوانات ،

حيوانات مذ كوره حقنه شوراسى دخی مقرر دركه كرك اخراجات و كرك ادخالات صاحبلى طرفين كرك مأمورلرينه قريه و يا ناحيه مأمورينى طرفندن حيواناتك عدد و اشكالى مبن اوله رق و يرلش بر شهادتنامه مخصوص ايرازينه مجبوردرلر اشبو معلومات كرك دفاترينه و كرك طرفندن و يرلن يول تذكره سنه قيد اولنه جقدر .

رابعاً املاك مختلطه نك حرايتنده قوللانلق اوزره ادخال اولتان حيوانات ايكي آي ظرفنده كلدكلى يره اعاده اخراج ايدلك ايجاب ايدر. رعى ايچون سوق ايديلن ويا يتشديرلك اوزره كوندريلن حيواناتك اعاده اخراجى ايچون اعطا اولتان لك اوزون مدت اون ايكي (۱۲) آي تجاوز ايدميه جقدر .

خامساً ترلاريني زرع ايتك ويا حيوانلرينى نواحى مرعالرنده يا خود خصوصى مرعالرده رعى ايلك اوزره هر كون حيوانلريله برابر خط امتياز دن كچن املاك مختلطه متصرف ويا چفتجىلى كرك مواقعنده اثبات وجود مجبوريتندن و ارسته درلر . بونلر خط امتياز دن طوغرىدن طوغرى به كچه بيليرلر ايسه ده دائماً يول تذكره لرينى خط امتيازى محافظه به مأمور كرك قولجىلرينه و مأمورين سائر به ايراز ايچون اوزرلرنده بولنديرملرى لازم كلير .

سادساً تناسل عرق ايله حاصل اولان حيوانات و حيوانلرك املاك مختلطه ده بولندقلرى مدت ظرفنده استحصال اولتان محصولات حيوانيه - كيفيت و كيتجه - ادخال اولتان حيوانات ايله متناسب اولدقلرى تقديرده يول تذكره سيله نقل ويا اخراج اولنه بيليرلر .

سابعاً رعى موسمنده كرك سورونك برقسمنده و كرك نواحى ويا قرأى متجاورده برعلت ساربه ظهور ايدر سه حيواناتك ديكر مملكته عودتى منع ايديله جقدر . يالكز كياك فقدانى و هوانك عنم مساعده سى و سائر كچي اسباب عاجله ظهورى مستنادر . بوكچي احوالده خسته لغه هنوز طوتلامش حيوانات آنجق تدابير احتياطيه و تأمينيه اتخاذ ايدلدكن صكره اعاده ايديله بيله جقدر .

ثامناً املاك مختلطه نك زرعى ايچون ادخال اولتان ويا مرعاه سوق ايديلن حيوانات يرلى حيوانات دن آيزى بولنديرملق لازم كلير .

تاسعاً بر يول تذكره سنه ذكر ايديلن و املاك زرعى ايچون يا خود رعى ايدلك يا خود يتشديرلك مقصديه ادخال اولتان هر هانكى جنس بر حيوان تلف ويا غائب اولور ويا خود سرقت ايديلر سه صاحبى مأمورين محليه معرفتيله يول تذكره سى اوزرينه وقوع حالى اشارت ايتديرمكه مجبور اوله جقدر .

عاشرأ مختلط اورمانلرك ايشلدلسنه ، يرلرله كوستريلن عيى شرائطه مساعده ايديله جك و بواورمانلر بوبابده هرايكي طرف ممالكنده مرعى اولان قوانينه توفيقاً اداره اولنه جقدر .

حادى عشر املاك مختلطه متصرفلى اموال غير منقوله (اراضى و مبانى) ايچون رسوم و تكاليف منضمه يي تأديه به تابع طوتيله جقدر . بوندن ماعدا شوراسى مقرر دركه بونلرك بيسوك و كوچك حيواناتى اون ايكي آيدن عبارت اولان صوك مهلت مرور ايتديكى حالده طرف ديكر راضيسنده لاعلى التعيين بر كونه ويركو ويا رسمه تابع طوتيله جقدر .

ثانى عشر طرفين عاقدن نواحى متجاوره مأموريننه املاك مختلطه صاحبلىنك منافعى محافظه به صالح تعليمات اعطا ايدله جقدر .

ثالث عشر املاك مختلطه صاحبلىنك مستفيد اولدقلرى مساعدات و تسهيلات ورثه مشروعه لرينه و قوانين محليه موجبنجه بونلرى مجاناً اكتساب ايدن اشخاصه قابل انتقالدر .

رابع عشر بالاده محرر فوائد و مساعدات دن آنجق اشبو صورت تسويه نك عقدى صره سنه موجود اولان املاك مختلطه مستفيد اوله جقدر .

محكمة تميز فرارى

محكمة تميز هيئت عموميه سى فرارى

محكمة تميز هيئت عموميه سندن صادر اولوب ۲۵ ضرب رايه سنه ۳۳۰ تاريخنده قرأى و بريلرله ۱۵۵۸ نومرولى اعلام مورتيبر :

« قتل حقنه »

نيكده سنجانغى بدايت محكمه سى جزا دائره سندن صادر اولان ۲۳ مارت سنه ۳۳۰ تاريخلى و اون نومرولى اعلام ايله متفرعانى باش مدعى عمومىلك مأموريت عليه سندن ۲۱ رجب سنه ۳۳۲ و ۲۰ حيران سنه ۳۳۰ تاريخلى و بيك بشيوز اوتوز بش نومرولى تبليغنامه ايله محكمه تميز جزا دائره سنه كوندلش وعاديتى جهتيله هيئت عموميه جه بالتدقيق اصرارى محتوى اولدينى متفقاً تحت قراره آلمش اولغله مطالعه و تدقيق اولندى .

اعلام مذ كورك مالى اقسرايده قره ويران قريه سندن راضيه يي ضرب ايدرك وفاتنه سبيت و يردىكي ادعا قلمسندنطولايى جانيته اتهام اولتان مزبورده نك زوجى چوللوز عبداه اوغلى علينك بالحاكمه من غير تعمد قاتل اولمق اوزره مجرميته وقانون جزانك يوز تيش دردنجى ماده سنه توفيقاً اون بش سنه مدته كوركه قونلسنه دائر مقدما و يريلان اعلام عند التميز فعل قتلك متهم مرقوم طرفندن ايقاع اولنديغنه دلالت ايدن

اسباب ثبوتیه کافیه سنده کوسترلماش اولمسندن ناشی نقض اوله رق اوراقك اعاده قلمسی اوزرینه بوکره جریان ایدن محاکمه نتیجه سنده متهم علینک بر مدتنبری نزدنده بولنان مزبوره راضیه ایله برابر اقسرایه کیتمکده لرایکن محاکمه تعیین ایدمه میان برسبله قتل مفضی طاش وسائر آلتله مزبوره یی جرح و قتل ایلدیکنه دائر علی الدرجات واقع اولان شهادات و معاینه راپوری و کندیسنک بیاناتی کبی اسباب ثبوتیه قانونیه مجرمیت قرارنده موضحاً و مفصلاً سرد و تعداد ایداش اولدیغندن حکم سابقده اصراره ۲۰ مارت سنه ۳۳۰ تاریخنده قرار ویرلدیکندن عبارتدر .

تبلیغنامه ده دخی مجرمیت قرا ینک اسباب ثبوتیه کافیه مستند اولسی لزومه متدائر و بناءً علیه مصیب اولان نقض واقعه اتباع ایدلسی مقتضی ایکن ظن غالبه ایقنا ایدیلان قرار اولده اصرار ایدلمش اولسی یولسز بولندیغندن اعلام مذکورده هیئت عمومی جه بالتدقیق نقضی طلب اولمشدر .

تدقیقات تمیزیه اجرا اولندقدده اعلام سابقده کوسترلدیکندن بحث ایدیلان اسباب ثبوتیه شهوددن بر قسمنک مزبوره راضیه نک متهم علی طرفندن ضرب و جرح ایدلمش اولدیغنی ایشدکلیینه و بر قسمنک دخی مزبوره نک وقعه دن بر کون اول متهم علی ایله برلکده کلکده اولدقلمی کوردکلرینه دائر اولدیغنی و طیب راپوری ایسه فاعل قتل تعیین ایدمه جه کبی بدیهی بولندیغنی حالده متهمک تعیین ایدمه میان برسبله قتل مفضی طاش وسائر آلتله مزبوره یی جرح و قتل ایتدیکنه ظن غالب حاصل اولدیغندن بحثله اولوجهله مجرمیت قرار ویرلمش وظن اوزرینه بنای حکم ایسه غیر جائز بولنش اولسنه و نقض سابقده بواساسه عائد اوله رق وارد و بجا کورلسنه مبنی اصول محاکمات جزائییه قانوننک اوچیوزاون دردنجی ماده سنه توفیقاً اعلام اخیر مذکورک دخی نقضیه اوراقك محله اعاده سنه و ایکی یوز غروش اعلام خرجنک ایلروده حقسز چیقه جق طرفدن تحصیلنه ۲۵ حزیران سنه ۳۳۰ تاریخنده اکثریتله قرار ویرلدی .

محکمہ تمیز هیئت عمومی سنده صادر اولوب ۲۱ اگستوس سنه ۳۳۰ تاریخنده قراری بریبرله ۲۱۵۴

نومرولی اعلام صورتیدر :

«مغدورک صبی بولنسی وصف جرمی تعیین ایدن احوالندر»

چوروم سنجانی بدایت محکمه سی جزا دائره سندن صادر اولان ۲۸ مایس ۳۳۰ تاریخلی وایکی نومرولی اعلام ایله متفرعاتی باش مدعی عمومیلک مأموریت علیه سندن ۲۴ شعبان ۳۳۲ و ۵ تموز ۳۳۰ تاریخلی وایکی بیک یوز طقسان نومرولی تبلیغنامه ایله محکمه تمیز جزا دائره سنه کوندرلمش وعائدتیه هیئت عمومی جه بالتدقیق اصراری محتوی اولدیغنی متفقاً تحت قراره آلمش اولغله مطالعه و تدقیق اولندی .

اعلام مذکورک مالی اوچیوز یکریمی بدی سنه سی حزیرانی ظرفنده چورومک اسکجه قریه سندن اسماعیل

اوغلی چی احمده جبراً فعل شنیع اجرا ایلدیکی ادعاسبله جنایتله اتهام اولنان اسماعیل اوغلی عمرک قانون جزانک یوز طقسان یدنجی ماده سنه توفیقاً اون سنه کورکه قونلسنه و انحق حین ایقاع جرمده اون سکنز یاشنی اکال ایتدیکی اکلاشلدیغندن قرقجی ماده قانونیه موجبجه مدت مذکورک تصفیله بش سنه مدتله و بش سنه ضبطیه نظارتی آلتنده بولندیرلسنه دائر ایکجی دفعه ویریلان اعلام عدالتیمز تحدید جزا قرارنامه سنده اسباب شدت اولق اوزره درمیان اولنان احوال ماهیت فعلی تشکیل ایدن احوال دن اوله رق اسباب مشدده قانونیه دن غیر معدود بولنش اولمسندن ناشی نقض ایله اوراقك اعاده قلمسی اوزرینه بوکره جریان ایدن محاکمه نتیجه سنده مغدورک صبی اولسنه و متهمک حال و شانیه فعلک صورت ایقاعنه نظراً هیئت حاکمه حائر اولدیغنی صلاحیت قانونیه وقاعت وجدانیه لرنی بالاستعمال تقدیر جزا ایتش اولدیغندن حکم سابقده اصراره قرار ویرلدیکندن عبارتدر .

تبلیغنامه ده دخی نقض واقعه بالاتباع نواقصی اکمال ایتک لازم کلیرکن حکم سابقده اصراره قرار ویرلسی مخالف قانون بولندیغندن بحثله اعلام اخیر مذکورک دخی هیئت عمومی جه بالتدقیق نقضی طلب اولمشدر .

تدقیقات تمیزیه اجرا اولندقدده هر قدر محکمه محلیه جه اسباب مشدده اولق اوزره متهمک حال و شانیه و فعلک صورت ایقاعی و مغدورک صبی بولنسی کبی اعلام اولده مندرج احوالک تکرار ایله برمنوال محرر قرار سابقده اصرار اولمقدده ایسه ده صورت جریان وقعه یه کوره فعلک جبرمادی یه اقتران ایتدیکی اکلاشلمش و مغدورک صبی بولنسی جرمک یوز طقسان یدنجی ماده قانونیه نک برنجی فقره سنه تطبیقی مستلزم اولان و وصف جرمی تعیین ایدن احوال دن اولسبله سبب شدت عد اولنه میه جنی بدیهی بولنش و احوال سائر دخی اساساً اسباب مشدده قانونیه دن معدود بولنماش اولسنه و نقض سابقده بواساسه عائد اوله رق وارد و بجا کورلسنه بناءً اصول محاکمات جزائییه قانوننک اوچیوز اون دردنجی ماده سنه توفیقاً اعلام اخیر مذکورک دخی نقضیه اوراقك محله اعاده سنه و ایکی یوز غروش اعلام خرجنک ایلروده حقسز چیقه جق طرفدن تحصیلنه ۲۱ اگستوس ۳۳۰ تاریخنده اکثریتله قرار ویرلدی .

محکمہ تمیز هیئت عمومی سنده صادر اولوب ۲۱ اگستوس سنه ۳۳۰ تاریخنده قراری بریبرله ۲۲۰۹

نومرولی اعلام صورتیدر :

«وقوع قتل حقنده تحقیقات ابتدائییه اجراسندن ذهول ایدلسی موجب نقضدر»

ادرنه ولایتی استیناف محکمه سی جزا دائره سندن صادر اولان ۱۹ رجب ۳۲۲ و ۳۱ مایس ۳۳۰ تاریخلی و قرق نومرولی اعلام ایله متفرعاتی باش مدعی عمومیلک مأموریت علیه سندن ۲۴ شعبان ۳۳۲ و ۵ تموز ۳۳۰ تاریخلی وایکی بیک یوز الی الی نومرولی تبلیغنامه ایله محکمه تمیز جزا دائره سنه کوندرلمش وعائدتیه

جهتیه هیئت عمومی که بالتدقیق اصراری محتوی اولدینی متفقاً تحت قراره آلتش اولمغه مطالعه و تدقیق اولندی .

اعلام مذکورک مالی ادرته نك زنجیر قیو محله سندن پاشا بك شهرتلی آرابه جی ملز حسن مرچ نهرینه القا ایتك صورتیه قتل و اتلاف ایلدکری ادعا قلمسندن طولایی جنایتله اتهام اولنان حاجی سعید اوغلی محمد و شریف اوغلی محمد چاوش و محمد اوغلی کور حسینک قانون جزانك قرق بشنجی ماده سی دلالیه یوزیتش دردنجی ماده سنه توفیقاً اون بشرسنه مدته کورکه قونملرینه دائر مقدما ویریلان اعلام عندالتمیز مواد جزائیه مجرمدن اول ذات جرمک ماهیت و کیفیت وقوعنك تعیین و تبیین لازمه اساسیه دن بولنش اولسنه نظراً فعل مبجوت عنده نهره القا اولدینی بیان ایدیلان مقتولك جسدینك بعدالحادثه صوبك سطحه چقمسی و یاخود دوائر ضابطه و ساططیه و كرك صورسائر ايله تحقیقات و تحریات لازمه اجرا اولنهرق کیفیتك میدان حقیقه ایصال و اخراجی مقتضی بولنش ایکن محکمه که اشبو جهات مهمه نك تحقیقندن ذهول اولنهرق نقصان تدقیقاته و علی الخصوص تحقیقات ابتدائیه اثناسنده مکرهاً وقوع اولدینی ادعا اولنان و قسماً دخی شهادتله تأید ایدن متهملرك اقرار مجردلرینه استناداً اتخاذ قرار اولنسی مخالف قانون کورولنش اولدینی کبی جهات مسروده بی متضمن اولان وکیل مدافعك مدافعتنك اسباب موجب قانونیه ايله رد اولنماسی دخی یولسز بولنش اولسندن ناشی نقص اولنهرق اوراقنك اعاده قلمسی اوزرینه بوکره جریان ایدن محاکمه نتیجه سنده متهملردن کور حسینک شاهدلردن نیقوله ایه اقشامکی وقعه بی افشا ایتامسی یولنده تهدیداته بولنسی و تحقیقات ابتدائیه ده مصطفی پاشا قائممقامی حضورنده متهملرك اقرار و اعتراف جرم ایلدکری نك شهادتله تحقق ایتسی ايله جرمک کیفیت و ماهیت وقوعی تعیین ایتش اولدینی کبی مرقومونك اقرار و اعترافلرینك مکرهاً وقوعی محکمه که ثابت اوله مامسنه و نهرک مجراسنده اقتضا ایدن تحریات اجرا ایدلش اولوب انهار عظیمه ده اجسادك صوبك جریاننه تابع اوله جفی ضروری بولنش و شمدی ایسه تحقیقات اجراسنه امکان قالماش بولنسنه و مدافعاته کلنجه ملز حسنک منازعه دن صکره بردها کورلامسی تغیب ایتش اولسنه دکل بلکه قتل و اتلاف ایدلدیکنه ده ازیاده قناعت وجدانیه بی تأمین ایده جکی و اوچ کشی یدنده بولنان بر آدمك باغرمسنه میدان ویرلمه جکی کبی وقعه نك کیجه اولمسی حسبله واقع اوله جق فریادكده خارجدن طویوله میه جفی جهته اولباده کی مدافعات ده مردود ایدوکنه بناء حکم سابقده اصراره ۲۰ مایس ۳۳۰ تاریخنده قرار ویرلدیکندن عبارتدر .

متهمل طرفندن ویریلان تمیز لایحه سنده اوله جرمک وجودی تحقق ایتك و بعده مجرم آرائق لازم کلیرکن ذهول ایدلدیکنه و جرم مذکور اقرار ایتلمی اشکنجه نتیجه سی اولدیغنه و مدافعات واقعه لری اسباب موجب بیانیه رد ایدلدیکنه دائر اعتراضات سردیه اعلامك تقضی استدعا قلمشدر .

تبلیغنامه ده دخی حکم سابقده اصراری متضمن ویریلان قرار اسباب موجبیه مستند بولندیغندن اعلام اخیر مذکورک هیئت عمومی که بالتدقیق تصدیق طلب اولنمشدر .

تدقیقات تمیزیه اجرا اولندقد هرنقدر محکمه محلیه که برمنوال محرر اسباب درمیانیه قرار سابقده اصرار اولنمده و تبلیغنامه ده دخی اعلامك تصدیق طلب ایدلمکده ایسه ده مقتولیتی ادعا اولنان حسنک جسدی اخیراً هیچ بر محله کورلاماش و معاینه ده ایدیه مامش و بنابرین وقوع قتل ايله صورت قتل محتاج تأید بولنش اولوب تحقیقات ابتدائیه اثناسنده متهملرك مکرهاً وقوعی درمیان اولنان و صورت شهادت ايله ده تأید ایدیلان اقرارلرینك خصوصات مذکوریه بی تعیین و تبیین مدار اوله میه جفی درکار ایکن جسد مقتول و بالخاصه وقوع قتل حقنده تعمیق تدقیقندن ذهول ایدلمسی و نتیجه تدقیقنده حسنک متهملر آره سنده نهره القا اولدیغنه قناعت حاصل اولدقدن صکره بولنرك اشبو القا فعانده نه وجهله متشارك اولوب و مرقوم حسنی متهملردن هر برینك نه وجهله طونوب نهره آتدقلمی و بولنردن مرقومی نهره آتالرك فی الحقیقه معلوم اولوب اولمادینی کیفیاتی ده ذات جرمه مؤثر حالاتدن اولق اعتباریه تدقیق اولنق لازمه دن ایکن كذلك ذهول ایدلش اولمسی یولسز و نقض سابقده بواساسه عائد اولهرق وارد و بجا بولندیغندن اصول محاکمات جزائیه قانوننك اوچوز اون دردنجی ماده سنه توفیقاً اعلام اخیر مذکورک دخی تقضیه اوراقنك محله اعاده سنه و ایکی یوز غروش اعلام خرجنك ایلروده حقسنر چقه جق طرفدن تحصیلنه ۲۱ اغستوس ۳۳۰ تاریخنده متفقاً قرار ویرلدی .

ملکری تمیز هیئت عمومی سنده صادر اولوب ۶ ایلول سنه ۳۳۰ تاریخنده قرار ویرلره اعلام صورته:

« قتل »

معموره العزیز ولایتی استیناف محکمه سی جزا دائره سندن صادر اولان ۳۰ حیران سنه ۳۳۰ تاریخی ویدی نومرولی اعلام ايله متفرعاتی باش مدعی عمومیلک مأموریت علیه سندن ۱۲ شوال سنه ۳۳۲ و ۲۱ اغستوس سنه ۳۳۰ تاریخی و ایکی بیک آلتی یوز قرق بر نومرولی تبلیغنامه ايله محکمه تمیز جزا دائره سنه کوندرلش و عائدی جهتیه هیئت عمومی که بالتدقیق اصراری محتوی اولدینی متفقاً تحت قراره آلتش اولمغه مطالعه و تدقیق اولندی .

اعلام مذکورک مالی اوچوز یکرمی طقوز سنه سی مارتنك طقوزنجی کیجه سی معموره العزیز ولایتیه تابع خریوت قصبه سنك کوربه قریه سندن پائل اوغلی کرکوری قتل ایلدیکی ادعا قلمسندن طولایی جنایتله اتهام اولنان طاشجی خچاطور مخدومی اوخانسنك قانون جزانك یوزیتش دردنجی ماده سنه تطبیقاً اون بش سنه کورکه قونلسنه دائر مقدما ویریلان اعلام عندالتمیز فعل قتلک متهم اوخانسن طرفندن ایقاع اولدینی حقنده کی اسباب ثبوتیه کافیه مجرمیت قرارنده توضیح قلممامش اولسندن ناشی نقص اولنهرق اوراقنك اعاده قلمسی اوزرینه بوکره جریان ایدن محاکمه نتیجه سنده مقتول کرکورک جسدنده بولنان قورشونك اوخانسنك خانه سنده ظهور ایدن روولورله آلتش اولدینی فناً تحقق ایتش و مذکور روولورک کندوسنك اولدینی

اقراریه ثابت اولمش و وقعه دن بر آن اول انداخت و استعمال ایدلیکنه دأر وقوعبولان اعترافاتی ده بو جهتلری مؤید بولنش اولسنه و کرچه مقتول آلت جارحه وواخذه ایله حصوله کلان و عنقیله باشنده بولنان جروحدن متأثراً وفات ایتش ایسه ده بو جرحه لک دخی او مثللو آلات ایله مرقوم اوخانس طرفندن ایقاع اولندیغنه ادله مبجونه شبه بر اقامسنه و بونلر ایسه قرار مجریمته کوسترلش و توضیح ایدلیه جک دیگر اسباب ده مفقود بولنش اولسنه بناءً حکم سابقه اصراره قرار ویرلدیکندن عبارتدر .

مهم مرقوم طرفندن ویریلان تمیز لایحه سی مفادی دخی حکم ایچون اسباب ثبوتیه موجود اولمادیغنه و وکیل مدافعک مدافعاتی اسباب موجب بیانیه رد ایدلدیکنه و مقتول روولور قورشونیه وفات ایتش اولمایوب آلت قاطعه ک تأثیریه ترک حیات ایتش اولدیغنه و نقصانی تحقیقاته دأر اعتراضاتدن بحثله اعلامک نقضی استدعاسنی متضمندر .

تبلیغنامه ده دخی نقض واقع فعل قتلک مهم اوخانس طرفندن ایقاع اولدیغنی حقه ده کی اسباب ثبوتیه ک مجریمت قرارنده توضیح اولنماسنه معطوف اولوب مقتولک وجودنده کوریلان اون یدی عدد مهلک جروح قاطعه دن عنقیله باشنده کی آلت قاطعه جرحه لرینک موته باعث اولدیغنی معاینه فیه راپوریه مثبت بولنسنه نظراً مقتولک جسندن چیقاریلان قورشونک مهمه کی روولورله ده آتیه بیه جکنک آکلاشلیمش اولسنک فعل قتلک مجرد مرقوم طرفندن ایقاع ایدلدیکنه نه صورته دلالت ایده بیه جکنی تصریح و سائق جرم اولان احوال تعیین و مدافعاتک کافه جهاتی حقه ده کی اجوبه ردیه مجریمت قرارند علی الانفراد ذکر و تفضیل اولنقی لزومه رغماً حکم سابقه اصرار ایدلمسند اصاب کوریه مامش اولدیغندن اعلام اخیر مذکورک هیئت عمومیجه بالتدقیق نقضی طلب اولنمشدر .

تدقیقات تمیزیه اجرا اولندقه هر نقدر محکمه محلیه جه بر منوال محرر اسباب درمیانیه قرار سابقه اصرار اولنمده ایسه ده مقتولک وجودنده کوریلان جرحه لردن عنقیله باشنده کی آلت قاطعه جرحه لرینک تأثیریه وفات ایدلیکی و جریحه ناریه دن متأثر اولمادیغنی معاینه راپوریه ثابت اولسنه نظراً جسد مقتولدن چیقاریلان قورشونک مهمک طبانجه سیله آتیش اولدیغنی آکلاشلمسی آلت جارحه ایله ایقاع ایدیلان قتل مذکورک مجرد مرقوم طرفندن ایقاع ایدلدیکنه دلالت ایده میه جکی درکار بولنش و بوبابده بشقه جه دلالت دخی کوستریه مامش اولمقله نقض واقع وارد و بجا کورلدیکندن اعلام اخیر مذکورک دخی اصول محاکات جزائیه قانوننک اوچیوز اون دردنجی ماده سنه توفیقاً تفضیله اوراقتک محله اعاده سنه وایکی یوز غروش اعلام خرجنک ایلروده حقیر چیه جق طرفندن تحصیله ۶ ایلول سنه ۳۳۰ تاریخده متفقاً قرار ویرلدی .

محکمہ تمیز هیئت عمومی سنده صادر اولوب ۶ ایلول سنه ۳۳۰ تاریخده قراری ویریلده ۲۶۷۱ نومردی اعلام صورتدر :

« ضبطنامه ک اصوله توفیقاً تنظیم و هیئت حاکمه طرفندن امضا ایله توثیق ایدلماش اولسی موجب نقضدر »

قدس شریف سنجانی استیناف محکمه سی جزا دأر سندن صادر اولان ۱ شعبان ۳۳۲ تاریخی و اونوز بر نومردی اعلام ایله متفرعاتی باش مدعی عمومیک مأموریت علیه سندن ۹ شوال ۳۳۲ و ۱۸ اغستوس ۳۳۰ تاریخی وایکی بیک التی یوز الی درت نومردی تبلیغنامه ایله محکمه تمیز جزا دأر سنه کوندرلش و عاڈتی جهتیه هیئت عمومیجه بالتدقیق اصراری محتوی اولدیغنی متفقاً تحت قراره آتیش اولمقله مطالعه و تدقیق اولندی .

اعلام مذکورک مالی یافه قضاسنک قیاق قریه سندن مصطفی بن حسن احمد و سحاره اسماعیل بن ابراهیم خلیل و خلوه بنت درویش ابراهیمی قتل و معامله جبروشدت اجرا سیله اشیا غصب ایتدکبری ادعا قلمسندن طولای جنایتله اتهام اولنان الحاج عیسی بن مصطفی عیسه ک اجرا قلنان محاکمه سی نتیجه سنده قتل قصدیه اولقسزین اولجه محکوم اولان رفقاسیله معاً مصطفی بن حسن احمدی ضرب ایدرک وفاته سییت ویردیکی ثابت اولدیغندن مجریمته و قاتون جزانک یوز یتش دردنجی و فاعل مستقلک تعین ایده مامسی جهتیه ده یوز سکسانجی ماده لرینه تطبیقاً مستحق اولدیغنی بش سنه کورک جزاسنک نصفی اولان ایکی بیجی سنه مدته کورکه قونمسنه دأر مقدما ویریلان اعلام عندالتمیز اولبابده کی محاکمه ضبطنامه سنک کافه اقسامیه تحدید مجازات قراری زیرلرینک هیئت حاکمه دن اکثریسنک و مجریمت قراری زیرینک دخی هیئت حاکمه ک کافه سنک امضالردن عاری بولنسندن و نوط ضبطلرینک و ثائق قانونیه دن اولماسندن ناشی نقض اولنهرق اوراقتک اعاده قلمسی اوزرینه بوکره جریان ایدن محاکمه نتیجه سنده امضادن عاری بولنان ضبطنامه اثنای محاکمه طوتلش ضبطنامه اولمایوب صورت بولنسنه و محکمه قلمندن کتیریه رک تدقیق اولنان ضبطنامه ایسه ال نوطی اولمایوب حضور محکمه ده تنظیم و محاکمه ک بتون صفحاتی جامع و هیئت حاکمه ک امضالرینی حاوی بولنش اولسنه بناءً حکم سابقه اصراره ۳ خیران ۳۳۰ تاریخده قرار ویرلدیکندن عبارتدر .

تبلیغنامه ده دخی محکمه محلیه جه بر منوال محرر درمیان اولنان اسبابه نظراً حکم سابقه اصراراً اتخاذ اولنان قرارک تصدیقی طلب اولنمشدر .

تدقیقات تمیزیه اجرا اولندقه اکثر اقسامی امضادن عاری بولنان ضبطنامه ک اصلی اولدیغندن و محاکمه ک صفحاتی جامع و هیئت حاکمه ک امضالرینی حاوی بولندیغندن بحث ایدیلان ورقه اصولی دأر سنده تنظیم ایدلش اولمایوب سطرلری چیزیه رک آره لرینه غیر مصدق کلمات علاوه ایدلش و بعض صحافی بوش

براعلمش ال ضبطندن یعنی نوطدن عبارت اولغله احتجاجه صالح واثاق قانونیه دن اولماسنه واعلامك مأخذی و تدقیقات تمیزیه به اساس اوله جق ضبطنامه نك ایسه عقیب محاکمه ده اصولنه توفیقاً تنظیم و هیئت حاکمه جانبندن امضا ایله توثیق ایدلمش اولسی لازمکه جکسه بناء مصیب اولان نقض سابقه قارشو برمنوال محرر اسباب درمیانیه قرار سابقه اصرار ایدلمش یولسز بولندیغندن اصول محاکمات جزائیه قانوننك اوجوز اون دردنجی ماده سنه توفیقاً اعلام اخیر مذکورك دخی تقضیه احکام قانونیه دائره سنه ایفای معامله اولنق اوزره اوراقلنك محله اعاده سنه وایکی یوز غروش اعلام خرجنك ایلزوده حقسنز چیه جق طرفدن تحصیلنه ۶ ایلول ۳۳۰ تاریخنده متفقاً قرار ویرلدی .

محکمہ تمیز حقورہ دائرہ سنہ ۳۳۰

محکمہ تمیز حقورہ دائرہ سنہ ۳۳۰ تاریخنده قراری ویرلده ۳۶۹ نومرولی اعلام صورتیبر :

• حصه شایعه فی تقسیم حصه دارلرک حضوریه و دعوتہ اجابت ایتمکلی تقدیرده
غیا بلرنده اجرا ایدیلیر •

آطنه ولایتی داخلنده طوقوج قریه سنده ساکنلر حاجی حسین آغا زاده محمد علی آغا ایله حاجی حسین آغا زاده احمد آغا و همشیره سی شفیقه خاتم بیننده متکون دعوایه دائر ولایت مذکوره استیناف محکمه سنندن ۱۵ کانون ثانی ۳۲۹ تاریخلی والی سکر عدلیه ویریلوب مزبور محمد علی آغا طرفندن تمیزاً تدقیقی استدعا قلنان اعلام طرفینك اعتراض وجواب لایحه لریله برابر بالمطالعہ تدقیقات تمیزیه اجراسنه ابتدار قلندی .

اعلام مذکور مندرجاتنه نظراً مزبور محمد علی آغا آطنه بدایت محکمه سنه با عرضحال مراجعتله قریه مزکوره ده واقع اولوب مرقومان احمد آغا و شفیقه خانم له مشترکاً متصرف اولدقلری معلوم الحدود بشیوز دونم ترلانك آلتمش ایکی حصه ده یکریمی بش حصه سی باقوجان کندوسنك اولوب حصه سنه اصابت ایدن ایکوز کسور دونم ترلانك تفریقیله تقسیم وتسلیمنی طلب و دعوی وسندی ضایع ایدلیکنندن قیدینك سؤال ایدلمشی تذکار ومدعی علیهادن احمد آغا دخی مدعی به ترلايه پدرندن انتقالاً قرق سنه دنبری بلا نزاع تصرف ایتدیکنی و فعلاً تصرفی ده شهود شخصیه ایله اثبات ایدمککنی مدافعه درمیان وطقوج قریه سنندن حاجی حسین آغانك وفاتیه متصرف اولدینی برقطعه ده یوز اون دونم اراضی اولادلری احمد و محمد ونظیفه و شفیقه والیفه به بعدالانتقال نظیفه خاتونك بشده بر حصه سی زوجی اولان وکیلی طرفندن بکر افندیه فراغ ایدلمش و دیگرلری نه ده تبدیلاً سند ویرلمش ایسه ده اخیراً بین الشرکا تقسیم ایدیلهرك اراضی مذکوره بکر افندی به وایکی قطعه ده یوز یکریمی دونم ایکی اولك الیفه خاتونه وایکی قطعه ده آلتیوز یکریمی دونم محکمه

احمد و محمد و شفیقه به اصابت ایدرک اولصورتله تصرف سنندی ویرلمش ایکن بونلردن محمدک مریم نامنده بریسنه اولان ذمتندن طولای برقطعه ده بشیوز یکریمی دونم ترلا انف الذکر تقسیمنه داخل اولدینی نظر دقته آلتیه رق بونك ایکوز آلتمش حصه اعتباریه یکریمی بش حصه سی اخراج به بالمزایده واقع اولان تبلیغات اوزرینه مریم خاتون نامنه فراغاً یکریمی یدی حصه سی ایچون مدیون مرقوم محمد و یوز آلتی سهمی ایچونده احمد و شفیقه والیفه ناملری نه تبدیلاً تموز سنه ۳۰۱ تاریخنده سند ویرلدیکنی مین برقطعه قید صورتی ابراز واره ایتلمش و بوجه بالا دینه مقابل مزبوره مریم قادینك تفرغ ایدلیکی مقداری مدعی محمد علینك مومی الیهادن تفرغ ایدلیکی لدی الاستعلام طابو دائره سنندن جواباً بیلدیرلمش اوزرینه مدعی علیهادن دعوت واقعیه اجابت ایتین شفیقه خاتون ایچون وکیل مسخر تعین قلندقدده و دیگر مدعی علیک مرور زمان دفعنك ردیه اراضینك تفریق و تقسیمی قرارگیر اولدقدن ومدعی علیه مزبورك عدم ورودینه بناء تقسیم واقعك غیا بنده اجرا ایدلیکی نائب طرفندن معطی راپورده بیان ایدلکدنصکره احمدك حضورنده و شفیقه خاتونك غیا بنده اجرا قلنان محاکمه و تدقیقات نتیجه سننده اراضی مذکوره نك بر موجب راپور تقسیمنه و حصه داران یدینه طابو سنندی ویرلسنه دائر صادر اولان اعلامك استینافاً تدقیقنه ابتدار اولندقدده دفتر خاقانی مأموری حضوریه امر تقسیم تکرار اجرا قلندقدنصکره جریان ایدن محاکمه و تدقیقات نتیجه سننده بر موجب تقسیم شرکا یدینه تصحیحاً سند خاقانی اعطاسنه و بوضورتله اکال ایدیلن نواقص حکم ابتدائینك اساسنه تأثیر ایلدیکنندن اصول محاکمه ذیلنك یکریمی دردنجی ماده سی موجب ججه اعلام مستأنف بهکده تعدیلاً تصدیقنه حکم وقرار ویرلدیکی اکلا شلمشدر .

مستدعی تمیز طرفندن اعطا قلنان لایحه تمیزیه ده اراضی تقسیمنده حصه دارلرک جمله سننك حضوری مشروط ایکن بعضیسننك بولندیرلماسی و محمد آغانك حصه سی مریم نام قادینه اولان بورچندن طولای آنك عهده سنه کچدکدنصکره کندیسسی تفرغ ایتدیکی حالده تقسیمده اشتراك وعلاقه سی قالمیان مرقوم محمد آغا حصه سنه اراضی تفریق اولنسی یولسز ومغایر اصول وقانون اولدیغندن بحثله اعلامك تقضی ولایحه جوابیه ده ده غیر وارد اولان اعتراضات مسروده نك ردیه موافق اصول وقانون بولنان اعلام میز بهك تصدیقی طلب واستدعا ایدلمشدر .

ایجابی مذاکره اولندقدده اعلام مذکور مندرجاتندن مستبان اولدینی اوزره اراضی مذکوره نك عمومی اساساً حاجی حسین عهده سننده اولوب بعدالوفات اولادلری احمد و محمد ونظیفه و شفیقه والیفه به انتقال ایدرک بونلردن محمدك خمس حصه سنندن بر مقداری مرقومك مریم نام قادینه اولان دینندن طولای اجرا دائره سنجه بالمزایده مزبوره مریمه صاتیله رق مقدار مذکور آندنده مدعینك تفرغ ایدلیکی طرفینك ادعا ومدافعاتیه قیود دفتر خاقانی مندرجاتندن اکلا شلمش اولسنه نظراً مرقوم محمدك دینندن طولای مرقومه عائد اولسی لازم کلن خمس حصه دن مریمه صاتیلان حصه مقداری بعد التحقيق تعین ایتدکن صکره بالعموم حصه دارلرک

جلب و دعوتیله و جاهلرنده و کلدکاری صورتده غیابلرنده امر تقسیمک اجرایی لازم کلور ایکن بوصورته تدقیقات اجراسندن و طرفین ذی الیدلک ادعاسنده بولندقلری حلاله مدعینک بوبایدہ کی شهودینک استماعندن بالذہول بروجه مشروح قرار ویرلمسی یولسز و مغایر اصول و قانون اولدیغندن اصول محاکمه حقوقہ قانوننک ایکوز اوتوزایکی و ایکوز قرق برنجی ماده لری موجبده اعلام مذکورک تقضیلہ نون مزبورک ایکوز قرق دردنچی ماده سنک فقرہ اولاسی حکمنہ توفیقاً کیفیتک اولصورته بالرؤیہ اعلامہ ربطی ضمتندہ محکمہ مذکورہ یہ اعادہ سنہ و مصارف تمیزینک دہ ایلرودہ حقسز حقیقہ جق طرفہ عائد اولسنہ ۱۷ نیسان سنہ ۳۳۰ تاریخندہ قسماً اتفاق و قسماً اکثریتلہ قرار ویرلدی .

محکمہ تمیز حقوقہ دائرہ سنندہ صادر اولوب ۲۹ ایلول سنہ ۳۳۰ تاریخندہ قراری ویریلده ۱۲۰۸ نومردی اعلام صوریتدر :

« اورمان نظامنامہ سنک قرق برنجی ماده سنہ دائر »

ارکلی شرکت عثمانیہ می وکیلی سعدالدین بک ایله اورمان اداره سی بینندہ متکون دعویہ دائر قسطنطونی استیناف محکمہ سنندن ۲۸ کانون ثانی سنہ ۳۲۸ تاریخی ویکرمی بکش عددی ایله ویریلوب مومی الیہ سعدالدین بک طرفندن تمیزاً تدقیقی استدعا قلنان اعلام باش مدعی عمومیلک مأموریت علیہ سنک مطالعہ نامہ سی آندقدن صکرہ طرفینک اعتراض و جواب لایحه لریله برابر بالمطالعہ تدقیقات تمیزیه اجراسنہ ابتدار قلندی . اعلام مذکور مندرجاتنہ کورہ : اورمان اداره سی وکیلی سینوب بدایت محکمہ سنہ باعرضحال مراجعتلہ مومی الیہ سعدالدین بکک کفیلی زونقولداقدہ مقیم حاجی احمد علی زاده علی افندی کفالتیلہ سینوبہ تابع کرزه ناحیہ سنک سکودلی و غایر طوغان و کورکنلی یوقوش دینکلہ معروف معلوم الحدود اورمان قطعہ سنندن جلویده ، قوله قاشی ، حافل باش اسکله لرینہ نقل ایدلک اوزرہ مومی الیہ احالہ اولنان آلتیوز اوتوز یدی مترو مکعب ویدی یوز قرق سکر دسیمترہ قادین و کورکن اشجاری ۳ شباط سنہ ۳۲۴ تاریخندن ۳ شباط سنہ ۳۲۹ تاریخندہ دیکن ایکی سنہ ظرفندہ قطع و اعمال و اخراج ایدلک و بدلیده بهر مترو مکعبی لیرا یوز غروش اعتباریلہ یکرمی یدی غروشندن حاصل اولان اون یدی بیک ایکوز اون طقوز غروش اون پاره سکر تقسیطده تأدیہ اولتمق و مدت تقسیط مرورنده ایام متأخرہ گذشته سیده بشقه جہ تأدیہ ایدلک شرطیلہ مقاولات محررلکندن مصدق برقطعه مقاولہ نامہ یہ ربط و بموجب مقاولہ نامہ بروجه پشین ویرلمسی لازم کلان بیک یدیوز یکرمی غروش یکرمی پاره ایله برنجی تقسیط بدلی اولان ایکی بیک یوز الی غروش ۲۰ شباط سنہ ۳۲۴ تاریخندہ و ایکسجی تقسیطه محسوباً طقوز یوز غروشده ۲۰ مارت سنہ ۳۲۵ تاریخندہ تسلیم ایدلش ایسده مدت مقاولہ خیلی مرور ایتدیکی حالده تقاسیط معیندن اون ایکی بیک درتیوز قرق آلتی غروش

اوتوز پاره ایله ایام متأخرہ گذشته سنندن بیک آلتیوز یدی بقی غروشکہ جمعاً عثمانلی لیراسی یوز غروش حسابیلہ اون درت بیک سکسان درت غروش اونپاره اورمان اداره سنک آلاجنی اولدینی جہتلہ مبلغ مذکورک اصالة و کفالة مومی الیهمادن تحصیلنی طلب و دعوی و برقطعه مقاولہ نامہ ابراز و اعطا ایتمی و یوم معینده مدعی علیهمانک کلاملری حسابیلہ اعطا ایدلکاری جواب لایحه لری بالقرائہ کندولرینک اقامتکاهی و شرکتک معاملات جاریه لرینک مرکزی زونقولداق اولدینی حالده دعوانک خلاف صلاحیت سینوب محکمہ سنندہ رؤیت ایدلمسی و مدت مذکورہ ظرفندہ مذکور اورماندن برکونا قطعیات و اخراجات و تسلیم و تسلیم واقع اولمامسی و مبرز مقاولہ نامہ زیرندہ کی امضال کندولرینک ایسده شرکت نامنہ تعهد و کفالت ایدلکاری جہتلہ اورمان اداره سنک رد ادعاسنی بسط و بیان ایدلکاری اکلاشللمسی اوزرینہ اول امرده مدعی عمومی حضوریلہ صلاحیت حقندہ درمیان اولنان ادعانک ردینہ قرار ویرلدکن صکرہ اساس ماده حقندہ اجرا قلنان محاکمه و تدقیقات غیاییه نتیجہ سنندہ مبرز مقاولہ نامہ یہ موضوع امضال شرکت عثمانیہ یہ اضافہ قلنمیوب شرکت عثمانیہ وکیلی دیه وضع اولندیگی جہتلہ وکیلک ثمن مبلغ ایله مؤاخذه سی لازم کلہ جکی کی کفیلک دخی کذلک اولصورته مطالبه سی ضروری و احکام فقیهه ایجابندن بولمسنہ مبنی بر موجب مقاولہ نامہ مدعی یہ مبالغک مع فائض مدعی علیهمادن تحصیلنہ دائر بدایه ویریلان اعلامک عندالاستیناف تصدیقہ حکم و قرار ویرلدیکی اکلاشلشد .

مستدعی سعدالدین بک طرفندن ویریلان لایحه ده : کرک بدایه و کرک استینافاً صلاحیت حقندہ درمیان ایدلیکی ادعاسیلہ مقاولہ نامہ ده مذکور ایکی سنہ ظرفندہ مذکور اورماندن اخراجات و قطعیاتده بولنادینی یولندہ وقوعبولان ادعاسی نظر دقتہ آلتیهرق برمنوال محرر قرار ویرلمسی یولسز و مغایر قانون اولدیغندن واسباب سائرندن بحثلہ اعلامک نقضی و لایحه جوابیده دخی غیر وارد اولان اعتراضات مذکورہ نک ردیلہ موافق اصول و قانون اولان اعلامک تصدیق طلب و استدعا اولنش و آنف الیان مطالعہ نامہ مآلی ایسه لایحه تمیزیه ده کرک صلاحیت و کرک اساسی حقندہ درمیان اولنان اعتراضاتک وارد کورلدیکی بیانندن عبارت بولمشدر .

ایجابی لدی المذاکرہ کیفیت هر نه قدر برمنوال محرر حکم و اعلامہ ربط اولنش ایسده اورمان نظامنامہ سنک قرق برنجی ماده سی بعدالقطع مدت محدودہ سی ایچندہ قالدیرلیان اشجارک اخذ و ضبط و آچقه سی دولته عائد اولمق اوزرہ فروخت اوله جخی مین اولوب دعوی حاضرده اشجارک مدت مقاولہ ظرفندہ قطع اولنادینی بیان قلنمسنہ و متعهد مرقومک قطع ایتدیکی اشجاردن دولای محکومیتی جہتنہ کیدلمسی هم بدل همدہ مبدلک ملک واحدده اجتماعی مؤدی اوله رق خلاف عدل و حقانیت اوله جغه کورہ بوجهات قانونیه نظر دقتہ آلتیهرق مدعی علیهمک اشجاری قطع ایدوب ایتدیکی اصولی دائرہ سنندہ تحقیق ایدلک و قطع ثابت اولنادینی تقدیرده مدعی اولان اورمان اداره سنک رد دعواسنہ قرار ویرلمک لازم کلور ایکن

برمنوال محرر قرار ویرلمی یولسز و مغایر قانون اولدیغندن اصول محاکمه حقوقیه قانوننک ایکوز اوتوز ایکنجی مادهسی موجبجه اعلام مذکورک نقضیه ایکوز قرق دردنجی مادهسی حکمنه توفیقاً کیفیتک وجه محرر دائره سنده بالرؤیه اعلامه ربطی ضمننده محکمه مذکوریه اعاده سنه و مصارفک ایلروده حقسز چیه حق طرفه عائد اولسنه ۲۹ ایلول سنه ۳۳۰ تاریخنده اکثریتله قرار ویرلدی .

محکمه تمیز حقوق دائره سنده صادر اولوب ۲۳ کانون اول سنه ۳۳۰ تاریخنده قرار ویرلده ۹۰۵ نومردی اعلام صورته بر :

« مدعی طرفندن انکار اولنان شرکتک مدعی علیه طرفندن وجودی اثبات اولنق لازمدر »

کرماسی قصبه سنک حمزه بک محله سنده ساکن قرانلقی علی فهمی افندی و لالا شاهین محله سنده مقیم سلحدار زاده محمد نوری افندی وقصبه مذکوریه تابع طرون بک قریه سنده متمکنه متوفی اسلام اغا زوجیه سی و ورثه صفارک وصیه سی خیره خاتم ایله باندردمه مقیم اوستریا دولتی تبعه سندن ماتو صومه بیننده متحدث دعوايه دائر باندردمه بدایت محکمه سندن تجارت صفی و ۲۰ کانون اول سنه ۳۲۹ تاریخیه و یوز اون عددی ایله ویرلوب مزبورون علی فهمی و محمد نوری افندیلر و خیره خاتم طرفلرندن تمیزاً تدقیقی استدعا قلنان اعلام باش مدعی عمومیلک مأموریت علیه سنک مطالعه نامه سی التدقندنصکره یالکز مستدعیرک اعتراض لایحه لرله بالمطالعه تدقیقات تمیزیه اجرا سنه ابتدار قلندی .

اعلام مذکور مندرجاته نظراً مزبور ماتو صومه نک مومی الیم علی فهمی و محمد نوری افندیلر ایله خیره خاتم ذمتلرنده بحسب الاصاله والکفاله الاجنی اولان اون بر بیک یدییوز قرق سکر بچق غروشک عندالاعتراض مهرلرینک تطبیق صورتیه و اولامدینی تقدیرده ییندن نکوللرینه تعلیقاً مومی الیم علی فهمی و محمد نوری افندیلر ایله متوفای مزبور اسلام اغانک ترکه سنه اضافله وصیه مزبوره خیره خاتمدن مع مصارف محاکمه تحصیلی حکمنی متضمن محکمه مذکورده دن غیاباً صادر اولان اعلام علیه نده مومی الیم طرفلرندن اعتراض اولنش اولدینی حالده معترضلردن مزبور محمد نوری افندی ایله خیره خاتمک یوم معینه دعوتیه اجابت ایتملرینه مبنی انلر حقنده اعتراض استدعا سنک ردینه قرار ویرلدن صکره مزبور علی فهمی افندی و معترض علیه وکیلنک حضوریه اجرای محاکمه لیدی الابتدار معترض علی فهمی افندی مقاوله نا- مده کفیللر ایچون باندردمه محکمه سی مرجع کوسرلماش اولدینی کی اقامتگاهلری کرماسی قصبه سی بولندیغندن دولای دعوانک رد ایدلسنی و مبلغ مدعی به صرف دین اولیوب معترض علیه ذمتنده سنه سابقه حسابندن تحقیق شرطیه خارج از حساب براقیلان اوتوز اتی بیک قیه علف اثمانیه اورخان غازی قریه سی ملتزی حاجی محمدن مبايعه ایدیلان یدییوز کسور بیک قیه مالک قومیسونجیلنی اولدیغندن محاسبه لرینک

رؤیتی و قومیسونجیلق اجرتنک تحت حکمه النمنی درمیانیه اعلام غیابینک فسخ وابطالنی طلب و استدعا ایتمسنه قارشو معترض علیه وکیل موکلنک معترض مومی الیه ایله یینلرنده شرکت اولدینی سولیس اوزرینه محکمه جه معترضک صلاحیت حقنده کی اعتراضک ردیه برابر دعواي واقعه طرفین بیننده بر شرکت خصوصیه دن متولد اولوب طرفیندن منتخب حکملر معرفتیه رؤیتیه و ویریه جک قرارک محکمه جه تسجیلنه قرار ویرلدنصکره اکال محاکمه ضمننده اخیراً تعیین قلنان کونده معترض علیه وکیل کله رک معترض مومی الیه یوم محاکمه دن خبردار اولدینی حالده کلامی جهته غیاباً جریان ایدن محاکمه و تدقیقات نتیجه سنده اصول محاکمه حقوقیه قانوننک یوز الی طقوزنجی مادهسی موجبجه اولباده کی اعتراض استدعا سنک ردینه حکم وقرار ویرلدی اکلشلمشدر مستدعی تمیزک اعطا ایلدکری لایحه اعتراضیه لرنده دعواي واقعه نک مرجع رؤیتی کرماسی محکمه سی بولنشیکن محکمه مذکوریه صلاحیت خارجنده رؤیت و فصل ایدلسی یولسز و مغایر قانون اولدیغندن بختله اعلام مذکورک نقضی طلب استدعا اولنش و مطالعه نامه مذکور مندرجاتی دخی جریان ایدن محاکمه درمیان قلنان صلاحیت اعتراضک اثنای تدقیقنده مدعی عمومی حاضر بولندیرلما مش اولدینی کی ذات دعوانک ایتمه تعلقندن طولای دخی کرک محاکمه غیابیه و کرک اعتراضیه جه مدعی عمومینک مطالعه سی النماسی مخالف قانون اولدینی بیانندن عبارت بولنشدر .

ایجابی مذاکره اولندقدمه هر نه قدر محکمه جه کیفیت بروجه محرر تحت حکمه النمنی ایسده اثنای محاکمه مدعی علیه طرفندن درمیان اولنان شرکتی مدعی مرقومک انکار ایتمکده اولسنه نظراً عقد شرکتک مدعی علیه طرفندن اثبات اولنسی اقتضا ایدرایکن محکمه جه بوجهندن بالذهلر بلادلل شرکتک وجودینه قائل اولنهرق رؤیت دعوی ضمننده کیفیتک حکملره حواله ایدلسی و کیفیت حکملره حواله اولندقدنصکره انلر طرفندن ویریه جک قرارنامه نک لاجل التسجیل و رودینه انتظار اولنسی مقتضی بولندینی حالده بولوزوم قانونیه رعایت اولنماسی و دعوايه صغیر بولندینی حالده اثنای محاکمه مدعی عمومینک حاضر بولندیرلماش مخالف قانون اولدیغنه بناء اصول محاکمه حقوقیه قانوننک ایکوز قرق برنجی مادهسی موجبجه اعلام مذکورک نقضیه قانون مزبورک ایکوز قرق دردنجی مادهسی حکمنه توفیقاً کیفیتک وجه مشروح دائره سنده بالرؤیه اعلامه ربطی ضمننده محکمه مذکوریه اعاده سنه و زبرده مفردات و معطیسی کوسرلین مصارف تمیزیه نک ایلروده حقسز چیه حق طرفه عائد اولسنه ۲۳ کانون اول سنه ۳۲۹ تاریخنده متفقاً قرار ویرلدی .

محکمہ نمبر جزا دائرہ سی مقررات

محکمہ نمبر جزا دائرہ سی صدر اولادہ ۲۱ ایلول سنہ ۳۳۰ تاریخ ۲۷۴۱ نومرولی عموم صورنیدر :

« جبراً فعل شنیع »

انقره ولایتی استیناف محکمہ سی جزا دائرہ سندن تنظیم واعطایا قلنان ۲۹ رجب سنہ ۳۳۲ و ۱۰ حیران سنہ ۳۳۰ تاریخلی ویوزر نومرولی اعلامک برائت جهتک دخی تمیزاً تدقیقی حقندہ محکمہ مذکورہ مدعی عمومیلکندن معطی استدعانامہ ایله اوراق متفرعه سی باش مدعی عمومیلک مأموریت علیہ سندن ۱۵ شوال سنہ ۳۳۲ و ۱۴ اغستوس سنہ ۳۳۰ تاریخلی وایکی بیک یدی یوز یکرمی نومرولی تبلیغنامہ ایله محکمہ تمیز جزا دائرہ سنہ تودیع ایدلمش ولدی التدقیق استدعانامہ نک مدت قانونیه سی طرفندن ویرلدیکی اکلاشلمش اولمغله بالقبول اوراق موجوده قرائت اولندی .

اعلام مذکورک خلاصه مالی قلعه جکک قوزای قشله قریه سندن عمر اوغلی احمدہ جبراً فعل شنیع اجرا ایلدکری ادعا قلمسندن طولای جنایتله اتهام اولنان کونای قشله قریه سندن جمال چاوش اوغلی عارف واسماعیل اوغلی بایرام و قوزای قشله قریه سندن محمد اوغلی حسنک اجرا قلنان محاکمہ لری نتیجه سنده مہمون مرقوموندن عارف ایله حسنک فعل مذکورہ جرائلری شہادات واقعہ وامارات سائرہ ایله ثابت اولمغله مجرمیتلرینہ و حسنک حین ایضای جرمدہ اون اوچ یاشنی اکال ایتدیکي جهتلہ قانون جزانک قرقچی مادہ سنک برنجی فقرہ سنہ توفیقاً عدم مسؤلیتیلہ با تعہدنامہ ابوینتہ تسلیمینہ وعارفک قانون مذکورک یوز طقسان سکرنجی و حین ایضای جرمدہ اون سکر یاشنی اکال ایتدیکي جهتلہ قرقچی مادہ لرینہ تطبیقاً مستحق اولدینی اوچ سنہ کورک جزاسنک نصفی اولان برنجی سنہ حبسنہ و بایرامک برائتہ ۷ حیران سنہ ۳۳۰ تاریخندہ حکم اولدیفندن عبارتدر .

مدعی عمومیلکک لایحه سنده مہم بایرامک دخی مدعینک بویونہ ایله چوکورک واغزینی قیایہ رق اولای عارفک فعلی ایقاعندہ معاونت ایلدیکي کبی بالاخرہ کندیوسی فعل مذکورک اجرا ایلدیکي مدعینک اصراری وشاهد لردن سید احمدک افادہ مضبوطہ مختلفہ سی وطیب راپوری مندرجاتیلہ مرتبہ ثبوتہ واصل اولمش ایکن بروجه محرر برائت قراری ویرلمسی مخالف قانون اولدیفندن بحثلہ اعلامک مرقومہ عائد برائت جهتک نقلاً للقانون نقضی استدعا قلمشدر .

تبلیغنامہ دخی لایحه دہ سرد اولنان اعتراضات مدعینک عندالحاکمہ تحویل لسان ایله کندوسنہ بایرامک ایلشمیدیکنی سویلسنہ وسید احمدک افادہ سیدہ تعلیل قلمش اولسنہ دائر اولان اسباب موجبہ نظرآ غیر وارد وتقديره عائد بولنش اولدیفندن مذکور استدعانک ردی و صورت جریان محاکمہ سیلہ جهت تطبیق

حقندہ برکونہ اعتراضہ محل کوریلہ میان اعلام مذکورک عارفہ عائد جهتک تصدیقی طلب اولمشدر .

جهت تمیزہلہ حکم جنائیدن دولای تدقیقات تمیزہ اجرا اولندقدہ مشتکی احمد استطاقاً ہر اوچ مہتمک کندوسنہ جبراً فعل شنیع اجرا ایلدکری بیان ایشکن عندالحاکمہ بایرامک محل جرمدہ بولندیفنی ویا لکنر عارفہ حسنک اجرای فعل شنیع ایلدکری سویلش اولدینی کبی استماع اولنان حقوق عمومیه شاهی سید احمد دخی عندالاستعطاق مرقومون بایرام و عارف و حسن علیہ لرنده شہادت ایلدیکي حالہ محاکمہ تحویل لسان ایدرک بایرامک فعل شنیعہ مدخلی اولمدیفنی افادہ و صورت جریان وقعیہ بیانات استطاقہ سنہ مباین بر صورتہ حکایہ ایش و صکرہ دہ استطاقاً مضبوط اولان افادہ سنک دوغری اولدیفنی بیان ایش وشو صورتلہ کرک مشتکینک و کرک شہاد مرقومک ادعا و اخبارلری اطمینان بخش اولہ جق بر ماہیتدہ قالہ مامش اولسنہ نظراً تعمیق تدقیقاتلہ حقیقہ وصول اسبابنہ توسل ایدلمک مقتضی اولدینی و بناء علیہ شہاد سید احمدک افادہ استطاقہ سنہ وقعیہ کندوسیلہ بر لکدہ مشاہدہ ایلدکری بیان ایش اولدینی ادریس اوغلی چاوش ایله مصطفی اونباشی و بکر اغانک اسماعیلک محکمہ یہ جلب واستماعلری ولدی الاقتصا شہاد سید احمدلہ موا جہلری الزم و دیگر حقوق عمومیه شاهی ادریس چاوشک قرائت اولنان افادہ مضبوطہ سی ایچون اول امردہ حیات ومماتنک مجهولتی حقندہ کی افاداتک صحت وعدم صحتی صورت رسمیتدہ تحقیق ایدلمک مقتضی بولندینی حالہ برمنوال محرر تدقیقات تعمیق وباخصوص مشتکی احمدک وجودندہ آثار جبریہ موجود اولوب اولدینی تحقیق ایدلمکسزین برائت ومجرمیت قرارلرنک اتخاذ اولنسی مخالف قانون اولدینی کبی شہاد سید احمد حقندہ مہملر طرفندن درمیان اولنان طعنک قرار مجریتدہ بیان اسباب ایله رد ایدلامسی ومحاکمہ نک صورت خفیہ دہ اجراسنہ بوبادہ مدعی عمومینک مطالعہ سی المنقیزین قرار ویرلمسی نقض حکمی مستلزم نواقص اصولیہ دن بولنش اولدیفندن حکم جنائینک اصول محاکات جزائیہ قانوننک اوچوز اون دردنجی و برائت جهتک اوچوز اون بشنجی مادہ لرینہ توفیقاً نقضیلہ احکام قانونیه دائرہ سنده ایضای معاملہ اولنقی اوزرہ اوراقنک محانہ اعادہ سنہ وایکی غروش اعلام خرجنک ایلرودہ حقسنر جیقہ جق طرفندن تحصیلنہ ۳۰ اغستوس سنہ ۳۳۰ تاریخندہ متفقاً قرار ویرلدی .

مذكره استرعا داره منبره

محکمہ تمیز استرعا داره منبره صادر اولوب ۱۸ هزاره سنه ۳۲۹ تاریخده قراری ویریلده ۶۷۶ نومردی اعلام صوریندر :

« فاطوره لرك بالاسنده محرر عنوانك بين التجار جاری اولان تعامل اقتضاسنجه امضا مقامنده اولسنه دائر »

رسم تمغا جزاسی تقدیسندن طولانی بیروت مرکز بدایت محکمه سی حقوق دائره سندن ایکنجی دفعه تنظیم واعطا قلنان ۲۵ کانون اول سنه ۳۲۸ تاریخ و آلتش سکن نومردی قرار نامه نك تمیزینی مستدعی محلی دیون عمومی مأموری جانبندن مدت قانونیه سی طرفندن معطی استدعا نامه و اوراق متفرعه سی باش مدعی عمومیک مأموریت علیه سنك مطالعه نامه سیله برلشدیریلده محکمه تمیزك هیئت عمومی سنده لدی المطالعه قرار نامه مذکورك اسباب زائده بی محتوی اولوب اصراری متضمن اولدینی تحت قراره الندقدن صکره دائره جه تدقیقات تمیزیه اجراسنه ابتدار اولندی .

مذکور قرارنامه نك خلاصه مفادی یوسف ومیخائیل غابریل طرفندن خواجه شکری پنا یوظه ویریلان یکرمی ایکی قطعه قاطوره وحساب بوصله سنك پولسز اولسندن ناشی ایکی بیک اوچیوز الی غروش جزای تقدینك مومی الیا یوسف ومیخائیل غابریلدن استیفا سی حقنده کی طلبك ردینه دائر مقدا ویریلان قرارك نقض ایدلسی اوزرینه اجرا قلنان قیقات اخیره نتیجه سنده اوراق مذکوره دن بر قسمنده محرر اولان امضانك یوسف ومیخائیل غبریلک امضالری اولمادینی اکلشلمسنه وتمغا نظامنامه سنك قرقچی ماده سنده تمغا رسمی ایفا ایدلیان برورقه نك جزای تقدیسی آنحق امضا صاحبه ترتب ایدمچکی مرقم بولنسنه نظراً مومی الیه مانك بوجهندن دولای منع معارضه سنه وامضادن عاری بولنان فاطوره لرك بالاسنده محرر اسمك بین التجار امضا مقامنده اوله میه جنی جهته اشبو فاطوره لرك اوراق ممضیه دن غیر معدود ایدوکی محلی تجارت اوطه سندن جواباً بیان وافاده ایدلش اولدیغندن بخله بوجهته متفرع اولان حکم سابقده اصراره قرار ویرلدیکنی متضمندر تمیز استدعا نامه سنده فقره قانونیه ده محرر «قبض و ابرای حاوی اولمیان» عبار سنده کی مقصد قانونی بومثللو فاطوره وحساب بوصله لرینك تعامله کوره امضادن عاری اوله جنی وقبض و ابرای ناطق اولانلرك نظامنامه مخصوص موجبجه ده فضلر رسم تمغایه تابع طوتیله جنی آزاده شرح وایضاح اولوب رسم تمغا تدقیق قومیسوننك بوباده کی قرار مخصوص ده بونی مؤید بولنمش ایکن محکمه محلیه جه بورالرنك نظر دفته آلتماش اولسی پولسز ومستلزم نقض اولدیغندن بخله قرارنامه اخیرك ده نقضی استدعا قلمنش ومطالعه نامه ده دخی محکمه محلیه جه نقض واقعه اتباع ایدلك لازم ایکن حکم سابقده اصراره قرار ویرلمسنك مغایرت قانونیه سندن بالبحث قرارنامه مذکورك نقضی لزومی کوسترلمشدر .

ایجابی لدی المذاکره تمغا نظامنامه سنك رسوم مقطوعه فصلنك اوتون برنجی نومردی موجبجه بشر پاره لك تمغا رسمنه تابعیتی درکار اولان سالف الذکر فاطوره لرك بالاسنده محرر عنوانك بین التجار جاری اولان تعامل اقتضاسنجه امضا مقامنده اولسنه ونقض سابق دخی بونقطه یه معطوف بولنسنه نظراً کیفیتك بوباده قرار قانونی یه ربطی مقتضی بولنمش ایکن محکمه محلیه جه بوراسی نظر دفته آلتقسزین بوجه محرر قرار ویرلمنی پولسز ومغایر قانون اولوب تمیز استدعا نامه سی محتویاتی شو صورتله وارد وبجا کورنمش ایدوکنندن قرار نامه اخیرك دخی بوجهته متفرع فقره حکمیه سنك اسباب مذکوره دن ناشی نقضه وایکیوز غروش اعلام خرجندن مقدا تأدی ایدلش اولان یکرمی بش غروش ربع اعلام خرجنك اجرای محسوبیله متبایسنك بالآخره حقمنز چیقان طرفه رجوع ایتك اوزره اول امرده مستدعی ولایت عمومی اداره سندن احذینه ۱۸ حزران سنه ۳۲۹ تاریخده متفقاً قرار ویرلدی .

انجمنه عدلیه مقرانی

انجمنه عدلیه ده صادر اولده ۷ ایلول سنه ۳۳۰ تاریخ و ۹۳ نومردی قرار صوریندر :


« معاملات اجرائیه یه دائر »

امور حقوقیه مدیریت بهیه سنك اشبو مذکره سی مطالعه اولندی

خلاصه مندرجاتی معاملات تجاریه ده معامله حجزیه ایفاسنه تصدی روح قانون ایله قابل تألیف دکل ایسه ده مسائل حقوقیه ده معامله ایفاسنه دوام اولنق لازم کله جکنی و مأجورک ویاخود برملکک تخلیه سنی طلبه صاحب ملک هرزمان حق اولدیغنی وبوبابده وضع حجزدن مقصد مدیونك اموالی قاجیره رق داینك اضرارینه سببیت ویرمک کی احواله میدان براقامق ایچون اتخاذ قلنان بر تدبیر احتیاطی اولوب بونك استیفا ی مطلوب معناسنی تضمن ایتیه جکی جهته تأجیل دیون قانوننك بالجله معاملات اجرائیه نك تأخیری صورتنده تلقی ایدیه میه جکنی بیاندن عبارتدر .

۲۱ اغستوس ۳۳۰ تاریخلی مذکره ده دخی عرض اولدیغنی اوزره تأجیل دیون قانونندن مقصد متمدنه ثابت اولان برشیک ویاخود تقبل والتزام اولنان برتمه دک اجراسنی وقت معینه تعلیق وتأخیردن عبارت اولقله منع مداخله ویاخود برعینه تعلق ایدن احکام ایله قانون مذکوره تصریح وتعداد ایدیلن موادك بوندن خارج قاله جنی درکاردر انلر حقنده کماکان معاملات اجرائیه ده دوام اولنقا قضا ایدر مثلاً برمحله وقوع

بولان مداخله نك منعی و یا خود مأجورك تخلیه سی و برمالك عیناً اعاده سی و مدت لری کلن دیوناتدن یوزده بشنك و وعده لری حلول ایدن بدلات اجاره نك یوزده یكرمی بشنك تخصیله دائر اولان احكام اجرا قانونه توفیقاً كالاول تنفیذ و اجرا ایدیلر دائره اجاره و قوعبوله حق حزمه كنجه حزمه اجرائیدن مقصد بر اعلامك تنفیذ و اجرای احكامیدر . چونكه حزمه ایدیلان اموال بعضاً اریر ، چوریر ، طورمقله بوزیلور مقوله دن بولورسه و یا خود مدت مدیده محافظه سی بر چوق مصرفه محتاج اولوبده صائلغه مجبوریت حاصل اولورسه بعدالبیع اتمانی هر حالده داینه اعطا ایتك ضروری اولدینی و بونك ایسه معامله اجرائیه دوامدن غیری برشی اولدینی دركاردر . برده معاملات ناس یكدیكره مربوط اولدیغندن اموال تجاریه نك حزمه دن استثناسیله افراده عائد اموالی حزمه ایتك اهل ثروتدن اولان مدیونلره قارشی اعلامی اجرا ایتك و دیگر مدیونلر حقنده بالعكس اجرای توقیف ایتك دیمك اولوب بونده ایسه تساوی معامله بولنه مایه جفندن بونقطه دن دخی دواثر اجرائیه حزمه وضعنه صالح اوله ماز . انحق داینلر الاجق لری تحت تأمین الموق مجبوریتده بولندقلری حالده محكمه یه مراجعتله حزمه احتیاطی وضعنه هر وقت حائز صلاحیت بولندقلرندن صور مشروحه دائره سنده ایضای معامله اولنسی موافق قانون اوله جنی مطالعه قلمش ایسه ده اجرای ایجابی منوط رأی سامی جناب نظارت پهایلریدر اولوبده



قسط غیر شرعی

استاد محترم سماحتلو علی حیدر افندی حضرت تلیزیه

« یکن نسخه دن مابعد »

ایشته احوال معروضیه مبنی بنده کز دیورم که مستأجرك وفاقی حالده وارث واحد اولسون متعدد اولسون اولاً باقیلیر اگر متوفای مرقومك كرك بدل ایجاردن و كرك جهات سائردهن اصلاً دینی یوق ایسه احوالده ورثه نك استیفای منفعته دوام ایده بیله جك لری شبهه سزدر . فقط دینی اولدینی صورتده دین مذکور نه جهتدن اولور ایسه اولسون بوحالده ورثه نك طوغریدن طوغریه استیفای منفعته دواملرینه جواز شرعی اولدیغندن بوحالده ده باقیلیر اگر دینك مقداری منافع باقیه ده داخل حساب اولوق اوزره موجود تركدن فضله و یا تركیه مساوی ایسه بصورتده تركه مستغرق بالدين دیمك اوله جنی و تركه نك استغراقی حالده ایسه اساساً حق ولایت حاكمه عائد اولوب ورثه نك یالکز اموال ذاتیه لرندن دینی بلافا استخلاص تركدن بشقه تركده بوكونا حق تصرف لری قلامش اولدینی کی بالاده ده ذكر اولدینی اوزره بصورتده عند الشافی موجره ده خیار فسخ ثابت اوله جفندن بوحالده موجر دیلر ایسه اجاره یی فسخ ایله مأجوری استرداد ایتك و دیلر ایسه حاكمه بالمراجعه مدت باقیه ایچون مأجوری یكیدن آخره ایجار ایتدیره ترك بشقه داین اولمادینی صورتده بدل ایجاردن عین حقنی آلمق و بشقه داین اولدینی حالده اله جنی مقدار ایله غرمایه داخل اولمقده خیر اولسی لازمكه جکی کی شاید بو صروده مثلی ایچون اجرت لازمكه جك قدر بر مدت مرور ایتدیکی حالده ورثه مأجوری تخلیه ایتیبوده حاكم طرفندن تركیه وضعید و یا خود موجر طرفندن مأجور استرداد اولنجه یه قدر مأجوری اشغال و یا خود اندن انتفاعده دوام ایتدك لری حالده موجر طرفندن طلب وقوعبولامش اولسه بیله مذهب شافی یه كوره ینه غاصب اوله جق لری و عند الشافی منافعده مضمون بولندینی جهته عقار مأجور معدلاً استغلال اولسه دخی بوحالده ورثه نكده مأجوری اشغال و یا اندن انتفاع ایتدك لری مدت ایچون اجر مثل ویرملری اقتضا ایده جكندن بوحالده موجر اجاره یی فسخ ایتامش اولسه بیله اجرته ضمان اجتماع ایده میه جکی قاعده سنه بناء مدت مذكوره ایچون ایزوجه بدل ایجار طلبنده ده حق اوله ماز . وا كرك دینك مقداری تركدن از ایسه بصورتده ورثه تركیه رجوع ایتامك و میتك ذمتی بری اولوق

شرطيله كندی ماللردن دینی ایفا و یا خود ترکه دن دین مقدارینی عزل و تفریق ایتدیکجه عندالشافعی اظهر قوله كوره ترکه نك مجموعنده و بعض قوله كوره دین مقدارنده تصرفلری نافذ اولمیه جنی کبی بو صورتده استیفای منفعتده دواملریده قبل قضاء الديون دهن حکمنده اولوب هر بر جزئی حق غیرله مشغول اولان ترکه نی بلاوجه شرعی اتلاف دیمك اولغله مجله نك ۷۴۱ نجی ماده سی موجبجه ینه ضماندن بری اولماملری لامککور. وارنك تعددی بحثه کلنجه « تفصیلات معروضه دنده مستبان اولدینی اوزره وارث مغدد اولسه دخی مدیون اولان ترکه ده تصرفك عدم جوازی خصوصنده عین احکامه تابع اولماریله بونلرکه حصه لری نسبتنده بدل ایجاری ترکه دن تأدییه ایتلری بوبابده کی احکام فقهیه به توافق ایده منظرین ایدرم چونکه بونلرک بدل ایجاری حصه لری نسبتنده ترکه دن تأدییه لری باقسیم ترکه دن اول اولوق وار ویا صکره اولوق واردر اکر ترکه نك یقسیمندن اول اولور ایسه تأدییه حصه لریه نسبت موضوع بحث اولماق لازمکلیر زیرا ترکه نك تقسیمندن اول دینك ترکه دن ایفاسی حالده دین ارندن مقدم اولوق اعتباریه حکم ارث دینك ایفاسندن صکره باشلایه جفتدن او حالده تأدییه نك حصه لره نسبتی نظر اعتباره الله ماز واکر ترکه نك تقسیمندن صکره اولور ایسه او حالده ترکه نك تقسیم قضا دیندن اول اولوسی ایجاب ایدرکه اوده جائز دکلدر زیرا قسمت نافذ اولمز. بوندن بشقه ورثه نك قبل قضاء الديون استیفای منفعتده دواملریه جواز شرعی اولماسنه کوره بونلردن بعضیسنك استیفای منفعتدن استسکاف ایتسی بدل ایجاریک لزوم و ترکیه عائدتی حقننده برکونا حکم و تأثیری جائز اولمیه جنی کبی مرقوملردن بعضیسنك انتفاعی نفسنه حصر ایله دیکرلرینی منع ایتسی صورتنده ده انتفاعی نفسنه حصر ایدن وارنك حرکی اساساً غصب و اتلاف فعلی تشکیل ایده جکندن بوبابده کی احکامکده بالاده تفصیل اولتان مسائله قیاساً متضخ اوله جنی درکار اولوب انحق بوضورتده انتفاعدن منع ایدیلان وارنك قبل قضاء الدین تضمین اده اسنده بدل ضمانه کندوسندن احق اولان موجب وار ایکن کندوسی منع ایدن وارنه قارشو خصوصتی متوجه اولمسه کرکدر ایشته مباحث مذ کوره حقننده فقیرك اکلایشم بو مرکزده اولدینی معروضدر .

بانیه مرکز بدایت محکمه سی حقوق رئیس

ع رهنری

تصحیح

بالاده محرر مقاله دن کچن نسخه ده مندرج قسم اولنك ایکنجی صحیفه سنك یکرمی اوچنجی سطرنده کی « حنیفه » حتفه ویکرمی آلتنجی سطرده واقع موجود محلول موجود ملوک و صوک سطرنده کی احد عافدین احد عافدینک و اوچنجی صحیفه نك طقوزنجی سطرنده واقع علیه لرینک علیه لرنده و اون طقوزنجی سطرده واقع بالاجتماع اوله حق ایکن سهو مرتب اوله رق یا کلش یازلمش اولدیتی کی یکرمنجی سطر نهایتنده ده متوفانك ترکه سی برینه متوفانك اولوب یازلمش اولدیغندن تصحیح کیفیت اولور .

مندرجات

۵ . تشرین ثانی ۱۳۳۰

قسم رسمی

نومبرهات عریه	— (۱)	۲۱	۳۳۰	۶۳۲۹
»	(۲)	»	»	۶۳۳۰
»	(۳)	»	»	۶۳۳۰
»	(۴)	»	»	۶۳۳۱
»	(۵)	»	»	۶۳۳۱
»	(۶)	»	»	۶۳۳۲
»	(۷)	»	»	۶۳۳۳
»	(۸)	»	»	۶۳۳۴
»	(۹)	»	»	۶۳۳۴
»	(۱۰)	»	»	۶۳۳۴
»	(۱۱)	»	»	۶۳۳۵
قوانین و نظامات	(۱) —	اسرار عسکریه فی افشا و جاسوسلق حقننده	۱۶	تشرین اول ۶۳۳۵
»	(۲)	مدت جزایه لرینک اوچ ربعی اکیال	۲۳	» ۶۳۴۰
»	(۳)	حرکات ارضیه و حادثات حربیه مناسبتیه	»	»
»	(۴)	دیگر محالیر توقیفخانه لرینه نقل ایدیلن	»	»
»	(۵)	مظنونلرک دعاوینک صورت رؤیت	»	»
»	(۶)	واکالی حقننده	»	»

